

ኢብራዌ አሳው ፃፊትዳ ኪታ ጌሉዋ

ሃዌ ጳውሎስኔ ጳጳርሲ ፃፊዳዋዳን ኪታ ጊዳናን ቲሚርቲ ጊዲዳ ፃፊትዳዋ፡ ዋልቃማ ቱጋይ ጋኪና፡ አማኑዋ አጋናው ማቲዳ አማኒያ አሳቱዋሳ (10:32-39)። ሃ ማፃፋ ፃፊዳዋ ኦኔንቶ ኤሪቲና። ሃ ፃፊያ ሁጴ ቆፋይ ኮይርቲዳ ኦንቱንቱን ዳዲያ ሰቁዋኮ ሰማናዳን ዩሱሳ ቶቃቲላ ቤሲዳ ኦንቱንታ ዞሬ። ሄ ፃፊ ኢብራዌ አማኒያዋንቱሲ ሚኒሲ ኦዲያዌ ዩሱሲ ኪሪሰቶሲ ቱማኔ ያሳ ፖሎ ቆንጨላ ጊዲያዋና። ሃ አማኒያዋንቱ ባሬንቱ አማኑዋን ሚናና ማላ፡ ኦንቱንታ ማንጴጴ። ኢ ሄዋ ኦሴዳ ሄዙ ቱማቱዋ ቆንጨሲዳ ቤሲ፡

1. ኢ አኬዳ ሜቱዋ ባጋና ባሬ አወዋሲ ቱሙ አዛዜቲዳ ዩሱሲ ያሳው ሜዲና ናዳ። ኢ ያሳ ናዳ ጊዳዳ ዲራው፡ ኤጫ ቃላ ጫቁዋ ዋዲያን ቲምቢቲያ ኦዲያዋንቱ፤ ኪታንቻቱዋ፤ ሃራይ ኣቲን፡ ሙሴ፤ ሎይሊ ኣዲያዋ።
2. ዩሱሲ ኤጫ ቃላ ጫቁዋ ቄሳቱዋ፤ ሎይሊ ኣዲያ፡ ሜዲና ቄሳ ጊዲያዋ ያሳይ ባሬ ሁጴው ኦዳዳ።
3. ዩሱሳ ባጋና አማኒያዌ ናጋራ፤ ያሻቲላ፤ ሃይቁዋ፤ ኣቲ። ዩሱሲ ቄሳቱዋ ኡባቱዋ ካፑዋ ጊዲያ ዲራው፡ ካሴ ኢብራዋቱዋ አማኑዋ ዋጋቱዋን ሜሄቱዋ ያርሹዋን ኩዋዳን ቤቲያ አቶቲላ ሃዲ ቱማ ጊዳናዳን ኡዳዳ።

ፃፊ ኢብራዌሊያ አሳ ታሪኪያን ዳር ኤሪቲዳ አሳ አማኑዋ ሎሚሱዋዳን ጎዔቲዳ (ሺምፑዋ 11)፤ ሃ ማፃፋ ናባቢያ አሳቲ ባሬንቱ አማኑዋን ሚናናዳን ቆፊሴ። ሄዋዳንካ (ሺምፑዋ 12) ናባቢያዋንቱ ባሬንቱ ኣይፊያ ዩሱሳ ቦላን ቲሺ ኡዲ ዋሲዳ፡ ባሬንቱ አማኑዋን ሚናናዳን ኣይ ማላ ሜቲኔ ዋዪ ጋኮ፤ ኦንቱንቱ ጌንጫናዳን ዞሬ። ወርሴላን ቃሲ ዞሪያኔ ኣኬኪሱዋ ቃላ ኢሚያዋን ወርሴ።

ሺምፓቱዋ ኡባቱዋሲ ኢሜቲዳ ቃንሳ ቆፋቱዋ

- ጌሉዋ፡ ያሳይ ዩሱሳን ቆንጨዳዋ (1:1-3)
- ኪሪሰቶሲ ኪታንቻቱዋ፤ ቦላ ጊዲያዋ (1:4-2:18)
- ኪሪሰቶሲ ሙሴ፤ ኢያሱ፤ ቦላ ጊዲያዋ (3:1-4:13)
- ኪሪሰቶሳ ቄሳቲላ ቶቃቲላ (4:14-7:28)
- ኪሪሰቶሳ ቃላ ጫቁዋ ቶቃቲላ (8:1-9:23)

ኪሪስቶስ ያርሼቴዳዌ ኦዋፔኔ ዳሪያዋ (9:23-10:39)
አማኑዋ ዳርቴላ (11:1-12:29)
ዖሳ ናሼቹሳ (13:1-19)

ዖሳይ ባሬ ናዓ ባጋና ሃሳዬዳ

1 ዖሳይ ቤኒ ዋዴ፥ ኑ አዎቲ ናባቲዋ ባጋና ዲማ ዲማ ኦጊያኒኔ ዳሮ ዋዲያን ሃሳዬዳ። 2 ሺን ሃ ወርሴላ ዋዲያን፥ ኡባባ አ ላቲሲዳ፥ ዬሌታ አ ባጋና ሜዴዳ ባሬ ናዓ ባጋና ኑሲ ሃሳዬዳ። 3 ናዓይ ዖሳ ቦንቾ ፖዑዋ ጰሌ፤ ቃሲ ኩሜንላ ዖሳ ኤሻ አኪዳ፥ ባሬ ዋልቃማ ቃላን ሃ ሳዓ ናጌ፤ ያቲዳ አሳ ናጋራፔ ጌሺዳ፥ ኡባፔ ቦላ ዖሳፔ ኡሼቻ ባጋና * ሳሉዋን ኡቴዳ።

ዖሳ ናዓይ ኪታንቻቲዋፔ ቦላ

4 ዖሳይ አው አሜዳ ሱንላቴላይ ኪታንቻቲዋፔ ጰቃ ጊዲያዋዳንካ፥ ኡንቲንቲፔፔ አ ሎይሊ ጰቁ ኦሌዳ። 5 አዪሲ ጎፔ፥ ዖሳይ ባሬ ኪታንቻቲዋፔ ኦና፥

«ኔኒ ታ ናዓ፤

ታኒ ሃቹ ኔው አወዋ ጊዳዲ»

ጌዴ? ዋይ ቃሲ ኦና፥

«ታኒ አው አወዋ ጊዳና፤

አካ ታው ናዓ ጊዳና»

ጌዴ? 6 ቃሲ ዖሳይ ባሬ ባይራ ናዓ ሃ ሳዓ ዬዳና ሃኒዴ፥

«ታ ኪታንቻቲዋ ኡባቲካ አው ጎዪኒኖ»

ያጌዳ። 7 ዖሳይ ኪታንቻቲዋባ ሃሳዪዴ፥

«ታኒ ታ ኪታንቻቲዋ ጫርኩዋ ኬሳይ፤

ቃሲ ታ ኦሳንቻቲዋካ ታማ ላጩዋ ኬሳይ»

ያጌ። 8 ሺን ባሬ ናዓዋ ሃሳዪዴ፥

«ዖሳው፥ ኔ ካዉቲላ ኦይዲ

ሜዲ ሜዲናው ዴዔ።

ኔ ካዉቲላ ዲሎቴላን አሃሳ።

9 ኔኒ ዲሎቴላ ሲቃዴ፤

ናቁዋ ኢፃዳ።

ዖሳይ፥ ኔ ዖሳይ ኔና

ኔ ሳጌቲዋፔ አሊዴ፥

* 1:3 ኡሼቻ ባጋና፥ ቦንቹዋኔ ዋልቃሳ ጊዲያዋ ቤሴ። 1:5 ማዝ 2:7፤ 2ሳዎ 7:14፤ 1ኦድ 17:13 1:6 ዛር 32:43 1:7 ማዝ 104:4 1:8 ማዝ 45:6-7

ናሹቻን ኢሊሊሲያ ዛይቲያ ኦኬዳዌ ሃዋሳ»
ያጌ። 10 ያሳይ ሃዋዲን ያጌ፤
«ጎዳው፥ ኮይሮ ኔኒ ሳዓ ሜዳዳ፤

ሳሉዋካ ኔ ኩሺያን ሜዳዳ።
11 ሃዋንቱ ኡባይ ዳያና፤
ሺን ኔኒ ዳዓና።

ኡንቱንቱ ኡባይካ አፊላዲን ዉራና።
12 ኔኒ ኡንቱንታ ጋቢያዲን ዳኮያና፤
ቃሲ ኡንቱንቱ አፊላዲን ላሜታናዋንታ።

ሺን ኔኒ ኔናካ፤
ኔ ላይላይ ኡባካ ዉራና»
ያጌ። 13 ሺን ያሳይ ባሬ ኪታንቻቱዋፔ ኢቱዋኔ፥

«ታኒ ኔ ሞርኬቱዋ ኔኒ
ጌዲያን ዩዲያዋ አላና ጋካናው፥
ሃዋን ታፔ ኡሺቻ ባጋን ኡታ»

ጊቤና። 14 ኪታንቻቱ ኡባይ ያሳው አላናዉኔ አቶቴላ ዳማና
አሳቱዋ ማዳናው ያሳይ ከቴዳ አያናቱዋ ጊዲኪኖዬ?

2

ዎልቃማ አንጂዋ

1 ሃዋ ዲራው፥ ኦኒ ሲሴዳ ቱሙ ዩዉዋፔ ሱጌቲ ዎራ ቤና
ማላ፥ ሄ ዩዉዋ ሎይሴ ኦይቃናው ቤሴ። 2 አዪሲ ጎፔ፥ ኪታንቻቱ
ኦዴዳ ቃላይ ቱማ ጊዲያ ዲራው፥ ናቂያ ዎይ አዛዜቴና አሳይ
ኡባይ ሙሪቴዳዋ ጊደፔ፥ 3 ያቲና፥ ኦኒ ሃ ዎልቃማ አቶቴላ
ሺኔኮ ጎፔ፥ ዋኒዳ አታኔ? ጎዳይ ኮይሮ ባሬ ሁጹው ሃ አቶቴላ
ኦዴዳ፤ ቃሲ ኢ ኦዴዳዋ ሲሴዳዋንቱ ኦሲ ጌሺዳ ኦዴዲኖ። 4 ሄ
ሲሴዳዋንቱ ማርካቴዳዋ ቦላ ያሳይካ ማላ፥ አራላባኔ ዲማ ዲማ
ማላታ ከቴቲያዋን ጉጂ ማርካቴዳ፤ ቃሲ ጌሻ አያና ኢሙዋካ
ባሬ ኮዩዳዋዲን፥ ጊሺ ጋሌዳ።

አቶቴላው ካሌሲያዋ

5 አዪሲ ጎፔ፥ ያሳይ ኦኒ ሃሳዪያ ሲንላፔ ያና አላሚያ፥
ኪታንቻቱዋ ሞዲሲቤና። 6 ሺን ያሳ ማፃፋይ ኢቲ ሳን ሃዋዲን
ያጌ፤
«ያሳው፥ ኔኒ አሳዋ ቆፓናው አሳይ አዬ?
ዎይ ኔኒ አው ሂርጋናው ኢ አዬ?»

7 ኔኒ ኪታንቻቱዋፔ
አማራዳ ዋዲያ አ ጉጻዳ።

አ ሁጲያንካ ቦንቹዋኔ
ሳባ አኪሊሊያ ዋጻዳ።

8 ቃሲ ኡባባ አ ጌዲያፔ ጋርሳና
ዋጻዳ ሞዲሳዳ።

ያጌ። አዪሲ ጎፔ፣ ያሳይ ኡባባካ አ ሞዲሴዳዋደን አኒ ሞዴቲቤናዊ አያይኔ ባዋ፤ ሺን ሃዒ ኡባባይ አው ሞዴቲያዊ ኑሲ ቤቴና። 9 ሺን ኑኒ ዬሱሳ ቤዔቶ፤ ዬሱሲ ያሳ አቶ ኬካቴላ ባጋና አሳ ኡባው ሃይቃና ማላ፣ አማራዳ ዋዲያ ኪታንቻቱዋፔ ጋርሳ ጌዳዳ። ቃሲ ሃይቁዋ ዋዪያ ኢ ዋዬቴዳ ዲራው፣ ፖዒያ ቦንቹዋኔ ሳባ አኪሊሊያ ዋጻዳዋ ሃዒ ኑኒ ቤዔቶ። 10 ያሳይ ኡባባ ሜዴዳዊ፣ ኡባባካ ናጌያዊ፣ ዬሱሲ ዳር ናና አሂዳ፣ ባሪናና ቦንቹሳና ማላ፣ ዋዪያ ባጋና ዬሱሳ ባላይ ባይናዋ ኦፊዳዋ ቤሴ፤ አዪሲ ጎፔ፣ ሄ ናና አቶቴላው ካሌሊያዊ ዬሱሳ።

11 አዪሲ ጎፔ፣ አሳ ጌሺያ ዬሱሳወካ ቃሲ ሄ ጌዬዳ አሳ ኡባወካ አዉ አቱዋ። ዬሱሲ ኡንቱንታ፣ «ታ አሻቱዋ» ጌዳ ዬላቴናን ጸሲያዊ ሃዋሳ። 12 ዬሱሲ፣

«ታኒ ኔ ሱንላ ታ አሻቶ አዋጅና።
ማባራ ሺቁዋንካ ኔና ጋላታና»

ያጌ። 13 ቃሲ ኢ፣ «ታኒ ታ አማኑዋ ያሳን ዋላና» ቃሲካ፣ «ያሳይ ታው አሜዳ ናናቱዋና ታኒ ሃዋን ዳዓይ» ያጌ።

14 ናና ጌዳ ኢ ጸሲያዋንቱ፣ አሹዋፔኔ ሱላፔ ሜዴቴዳ አሳቱዋ ጌዲያ ዲራው፣ ዬሱሲ ባሪ ሁጲው ኡንቱንታ ማላቲዳ፣ ኡንቱንቱ ሜዴታ አኩዳ፤ ቃሲ ኢ ሄዋ ኦፊዳዊ፣ ፃላሂያ ካፑዋ ሃይቁዋ ቦላ ማታይ ዳዒያዋ ባሪ ሃይቁዋን ቆዪሳናሳ። 15 ቃሲ ባሪንቱ ዳዑዋ ኡባን ሃይቆ ያዪዳ፣ ሃይቆ አይሌቲዳ ዳዒያዋንታ ኡባቱዋ አይሌቴላፔ ኬሴዳ።

16 አዪሲ ጎፔ፣ አብራሃማ ዛሪያ ኢ ማዲያዋፔ አቲን፣ ኪታንቻቱዋ ማዳናዊ ኤሪቴዳ። 17 ሄዋ ዲራው፣ አሳ ናጋራይ አቶ ጌቴታና ማላ፣ ያሳ ኪታን አማኔቴዳ ማሪያ ቄሳቱዋ ኡባቱዋ ካፑዋ ጌዳና ማላ፣ ኡባባኒ ኢ ባሪ አሻቱዋ ማላታናው ቤሴ። 18 አዪሲ ጎፔ፣ ኢ ባሪ ሁጲው ፓጩቴዳ ዲራዉኔ ዋዬቴዳ ዲራው፣ ፓጩቴያዋንታ ማዳናው ዳንዳዪ።

3

ዩሱሲ ሙሴፔ ቦላ

1 ሃዋ ዲራው፡ ያሳይ ያሳይ ጌሻ አሻቶ፡ ኑ ማርካቴላ ያሳይ ኪቴዳዋ ቁሳቱዋ ኡባቱዋ ካፑዋ፡ ዩሱሲ ኪሪሰቶሳ ቆፒቴ።
 2 ሙሴ ባሬ ኪታን ያሳ ጎሊያ ኡባን አማኔቴዳዋ ጊዴዳዋዳን፡ ዩሱሲካ ባሬና ዶሪዳ፡ ሃ ኦሶ ዩዴዳ ያሳው አማኔቴዳዋ። 3 አዪሲ ጎፔ፡ ኬጃቲያ ጎሊያፔ ኬጃያ ቢታኒ ቦንቹቲያዋዳን፡ ሙሴዋፔ አጂያ ቦንቹዋ ኢ አካናው ቤሲያዌ ኤሬቴዳዋ። 4 አዪሲ ጎፔ፡ ጎሊያ ኡባ ኬጃዳዌ አቲ አሳ፤ ሺን ኡባባ ኬጃዳዌ ያሳ። 5 ሙሴ ያሳ ጎሊያ ኡባን አማኔቴዳ ኦሳንቻ ጊዲዳ፡ ያሳይ ሲንላፔ ጋናዋ ማርካቴዳ። 6 ሺን ኪሪሰቶሲ ያሳ ጎሊን ናዳዳን አማኔቴዳዋ፤ ኑኒ አካና ጊዴ ናቬቻን ናጊያዋ ፃላቴላኒኔ አማኑዋን ናጎፔ፡ ያሳው ጎሊያ ጊዴቶ።

ያሳ አሳይ ሽምፑዋ ደማና

7 ሃዋ ዲራው፡ ጌሻ አያናይ ሃዋዳን ያጌ፤
 «ያሳ ቃላ ሂንቴንቱ ሃቹ ሲሲያባ ጊዶፔ፡
 8-9 ሂንቴንቱ አዎቱ ታው ኢዲ ማካሊዳ፡
 አይታው ላይላ ታ ኦሶዋ ቤዔዳ ባዙዋ ፓጪያ ጋላሳዳን፡
 ሂንቴንቱካ ዘሪያ አኬናን ኢፆፒቴ።
 10 ሃዋ ዲራው፡ ታኒ
 ሄ አሳ ሃንቁታዳ፡
 «ኡንቴንቱ ኡባ ዋዴ ባሬንቱ ዋዛናን ባሊና።
 ታ ኦጊያካ ኤሪቤይኪና» ያጋዲ።
 11 ሃዋዳንካ ቃሲ፡
 ታኒ ሃንቁታ ጫቃዳ፡
 «ታኒ ሽምፒያሳ ኡንቴንቱ
 ኡባካ ጌሊኪና» ያጋዲ።
 ያጌ።
 12 ታናዳን አማኒያዋንቶ፡ ዳዑዋ ያሳፔ ሂንቴንታ ሻኪያ ኢታ አማኔና ዋዛናይ ሂንቴናን ኦናኒኔ ዴዔና ማላ ናፔቴቴ። 13 ሺን ያሳይ ሂንቴንታ ኡባ ጋላሲ ሃቹ ጊዴ ያሲሺን፡ ሂንቴፔ ኦናኔ ናጋራይ ባሌሊና፡ ዘሪያ አኬናን ኢጃና ማላ፡ አቱ አቱዋ ዘሪቴ።
 14 አዪሲ ጎፔ፡ ኑኒ ኮይር ኑሲ ዴዒያ አማኑዋ ዉርሴላይ ጋካናው ሎይሊ ናጎፔ፡ ኪሪሰቶሳና አቲፔ ሻካና። 15 ያሳ ማፃፋይ፡
 «ያሳ ቃላ ሂንቴንቱ

3:2 ፓይ 12:7 3:7 ማዝ 95:7-11

ሃቹ ሲሲያዎ ገደፔ፣
ሄ ዎዴ ኡንቱንቱ ኢዲ ማካሌዳዎዳን፣
ዘሪያ ኣከናን ኢደፒቲ»
ያጌዳ።

16 ያሳይ ገያዎ ሲሲዴ፣ ኣው ማካሌዳ ኣሳቱ ኦኔ? ሙሴ ጌብጻፔ ካሌሲና ኬሴዳ ኡባቱዎ ገዲኪኖዬ? 17 ያሳይ ኦይታሙ ላይሳ ኦናን ሃንቄቲዴ? ኣኃይ ዎራን ኣቲዳ ኣሳቱዎ፣ ናጋራ ኣሉዳዎንታ ገዲኪኖዬ? 18 ቃሲ ያሳይ ባሬው ኣዛዘቲናን ኢዳዎንቱ ኢ ሸምፒያ ሳዓ ኡባካ ጌሌና ማላ፣ ኡንቱንቱሲ ጫቄዳዎፔ ኣቲን፣ ኦሲ ጫቄዴ? 19 ኡንቱንቱ ኣማኒቤና ዲራው፣ ሸምፒያሳ ጌላናው ዳንዳዪቤናዎ ኦኒ ቤዔቶ።

4

1 ሲሚ ያሳይ ኦና ባሬ ሸምፒያሳ፣ «ጌሊሳና» ጌዳዌ ቢራ ገደፔ፣ ሂንቲፔ ኦኒኔ ሄ ሸምፒያሳ ጌሊናን ኣቲና ማላ ናጌቶ።
2 ኣዪሲ ጎፔ፣ ኡንቱንቱ ዎንጋላ ሚሺራቹዎ ሲሴዳዎዳን፣ ኦኒካ ሲሴዳ፤ ኡንቱንቱ ሲሴዲና፣ ሸን ኣማኒዴ ኣከቤና ዲራው፣ ኣይኔ ኡንቱንታ ጎዒቤና። 3 ገደፔካ፣ ያሳ ኪታይ ሳዓይ ሜዴቶዴፔ ደሚና ፖሌቲዳዎ ገደፔኔ፣ ያሳይ፣
«ታኒ ሃንቄታ ጫቃዴ፣

«ኡንቱንቱ ታኒ ሸምፒያሳ ኡባካ ጌሊኪኖ» ያጋዲ»
ጌዳዎዳን፣ ኦኒ ኣማኔዳዎንቱ ኢ ሸምፒያሳ ጌላና። 4 ኣዪሲ ጎፔ፣ ላፑንላ ጋላሳባ ኢቲሳዓን ያሳ ማፃፋይ፣ «ያሳይ ላፑንላ ጋላሳን ባሬ ኦሱዎ ኡባፔ ሸምፔዳ» ያጌዳ። 5 ቃሲ ሄ ሳዓን፣ «ኡንቱንቱ ታኒ ሸምፒያሳ ኡባካ ጌሊኪኖ» ያጌዳ። 6 ዎንጋላ ሚሺራቹዎ ኮይሮ ሲሴዳዎንቱ ኣዛዘቲቤና ዲራው፣ ሸምፑዎ ሳዓ ጌሊቤይኪኖ፤ ኢቲ ኢቲ ኣሳቱ ያ ጌላናዎንቱ ዴዒና። 7 ያሳይ ዳሮ ዎዲያፔ ጉዪያን፣ ዳዊታ ባጋና ላዒንሎዎ ኢቲ ጋላሳ፣ «ሃቹ» ጌያ ቃላን ከሬዴ፣

«ያሳ ቃላ ሂንቲፔ ሃቹ ሲሲያዎ ገደፔ፣
ዘሪያ ኣከናን ኢደፒቲ»
ያጌዳ። 8 ያሳይ ሸምፒያሳ ኣሳ ኣፊዴ ኢያሱ ሸምፒሴዳዎ ገዲንቶ፣ ያሳይ ሃራ ጋላሳዎ ጉዬ ከሬና። 9 ሄዎ ዲራው፣ ያሳ

3:15 ማዘ 95:7-8 3:16 ፓይ 14:1-35 4:3 ማዘ 95:11 4:4 ዳዎ 2:2 4:5 ማዘ 95:11 4:7 ማዘ 95:7-8 4:8 ዛር 31:7፤ ኢያ 22:4

አሳው ሳምባታ ሽምጥ ናጌቲ ኡቲዳ። 10 አዪሲ ጎፔ፣ ያሳይ ሽምጥያሳ ጌሊያ ኦኒኔ፣ ያሳይ ባሬ ኦሱዋፔ ሽምጥዳዋዳን፣ ኢካ ባሬ ኦሱዋፔ ሽምጥ። 11 ሲሚ ኢሰራዔሊያ አሳይ አዛዜቲናን ኢዲዳ፣ ያሳና ኢቲፔ ሽምጥያሳ ጌሌናን አቲዳዋዳን፣ ኑፔ ኦኒኔ ሄዋ ማላ ኢፀዋን ያ ጌሌናን አቲና ማላ ሚኖይቲ።

12 አዪሲ ጎፔ፣ ያሳ ቃላይ ሚዲናው ዳዒያዋኔ ኦሊያዋ፤ ላዑ ባጋና ሌፊቲዳ ማሻፔካ አዲዳ ኩሴ። ሄ ቃላይ ሽምጥኔ አያናይ፣ ኩሪኔ ኮልዚ ኢቲፔ ጋኬቲያሳ ሻካና ጋካናው ጫዳ። ቃሲ አሳ ዋዛናን ዳዒያ ኮሻኔ ቆፋ ኢ ሻኬ። 13 ኑኒ ኦሊያዋ ዋቺያ ያሳ ሲንሳን ኡባባይካ ቤቲያዋፔኔ ቆንጨያን ዳዒያዋፔ አቲን፣ አ አይፊያን ጌሚያ ሜዴታይ አያይኔ ባዋ።

ዩሱሲ ቄሳቲዋ ኡባቶ ዋልቃማ ካፑዋ

14 ሲሚ ሳሉዋ ቤዳ፣ ቄሳቲዋ ኡባቲዋ ዋልቃማ ካፑ፣ ያሳ ናዓይ ዩሱሲ፣ ኑሲ ዳዒያ ዲራው፣ ኑ አማኑዋ ሎይሊ ናጌቶ። 15 አዪሲ ጎፔ፣ ኑ ቄሳቲዋ ኡባቲዋ ካፑ ኑኒ ዳቡሪያ ዋዳ ኑሲ ቃሬታናው ዳንዳዬ፤ ናጋራ ኢ ኦሊቤናዋፔ አቲን፣ ኑናዳን ኡባባንካ ፓጩቲዳ። 16 ሲሚ ኑና ኮሺያ ዋዳ ማዲያ ማሮቲላ አካናዉኔ አዶ ኬካቲላ ዳማናው፣ አዶ ኬካቲላይ ዳዒያ ሳሳ ያሳ አራታኮ፣ ያዩናን ሺቆይቲ።

5

1 ቄሳቲዋ ኡባቲዋ ካፓቲ ሁጲያን ሁጲያን ባሬ አሳ ጊዶፔ ደሬቲዳ፣ ሄ አሳ ጊሻታው ያሳው ኦላናው፣ ኢሙዋ ኢማናዉኔ ናጋራ ያርሹዋ ያርሻናው ሱንጮቲዲና። 2 ኢ ባሬ ሁጲው ዳቡራንቻ ጊዲያ ዲራው፣ ታማሪቤናዋንቶኔ ባሊያዋንቶ ቃሬታናው ዳንዳዬ። 3 ሄዋ ዲራው፣ ሄ ቄሳቲዋ ኡባቲዋ ካፑ አሳ ዲራው ያርሹዋ ያርሺያዋዳን፣ ባሬ ሁጲ ናጋራ ዲራዉካ ያርሻናው ቤሴ።

4 ያሳይ አርና ቄሳቲዋ ኡባቲዋ ካፑዋ ጊዳና ማላ ያሴዳዋዳን፣ ያሳይ ያሳናፔ አቲን፣ ኦኒኔ ቄሳቲዋ ኡባቲዋ ካፑዋ ጊዲያ ቦንቹዋ ባሬው አካናው ዳንዳዬና። 5 ሄዋዳንካ፣ ኪሪሰቶሲ ቄሳቲዋ ኡባቲዋ ካፑዋ ጊዲያ ቦንቹዋ ባሬው አኪቤና፤ ሺን ያሳይ አ፣ «ኔኒ ታ ናዓ።

ታኒ ሃቺ ኔው አዉዋ ጊዲዲ» ያጌዳ። 6 ሄዋዳንካ ቃሲ ሃራሳን፣

4:10 ዶዋ 2:2 5:3 ዋግ 9:7 5:4 ኬስ 28:1 5:5 ማዝ 2:7

«ማልኪ-ዲዳቂ * ቁሳ ጊዳዳዋዳን፤
ኔኒካ ሜዲናው ቁሳ ጊዳና»

ያጌዳ።

7 ዬሱሲ ሳዓን ዳዒያ ዎዴ፣ ባሬና ሃይቁዋፔ አሻናው ዳንዳዪያ ያሳ ሎይሲ ዬኪዳኔ እርግዳ ዎሴዳኔ ኦቼዳ፤ ያሳይ ኣ ዎሳ ሲሴዳዋ፣ ኢ ባሬና ቶቼዳዋሳኔ ኣው ያዬዳዋሳ። 8 ዬሱሲ ያሳ ናዓ ጊዳፔኔ፣ ባሬ ዋዬቴዳ ዋዪያን ኣዛዜቲያዎ ታማራዳ። 9 ዬሱሲ ባሬ ኦሱዋ ፖሌዳ ዎዴ፣ ባሬው ኣዛዜቲያ ኡባው ሜዲና ኣቶቴላ ዳማናው ጋሶ ጊዳዳ። 10 ቃሲ ያሳይ ማልኪ-ዲዳቂ ሱንሳቴላዳን፣ ቁሳቴዋ ኡባቴዋ ካፑዋ ጊዳና ማላ፣ ኣ ሱንሴዳ።

እሳይ ባለናዳን ኦዴቴዳ ሚኖ ኦዲዋ

11 ኦኒ ሃ ዬወዋን ሃሳያናባይ ዳሮባይ ዳዔ፤ ሺን ሂንቴንቱ ኣከካናው ኣዛላ ጊዲያ ዲራው፣ ሂንቴንቱሲ ኦዲ ጌለሳናው ዋዪሴ። 12 ኣዪሲ ጎፔ፣ ሂንቴንቱ ሃ ዎዲያን ታማራሲያዋንታ ጊዳናው ቤሶፔካ፣ ያሳ ቃላ ኮይሮ ቲሚርቲያ ሂንቴንታ ዛሪ ታማራሲያ ኢቲ ኡራ ኮሺ፤ ሂንቴንታ ኡሺያ ማላ ኮሺፔ ኣቲን፣ ጮሚያ ቁማ ኮሺና። 13 ማላ ፓኬቲዳ ዳዒያ ኦኒኔ ጋጪኖ ናዓ ጊዲያ ዲራው፣ ያሎቴላ ቲሚርቲያዎ ኤሬና። 14 ሺን ሚኖ ቁማይ ኢታኔ ኬካ ዳዑዋ ዳሩዋን ሻኪ ኤሬዳ ዎዛናማ ኣሳሳ።

6

1-2 ሄዋ ዲራው፣ ኪሪሰቶሳ ቲሚርቲያ ቢሮ ዶሚያዎ ኣጊዳ፣ ዎዛናማ ኣሳ ቲሚርቲው ሲንሳው ቦይቴ፤ ኮይሮ ኦኒ ታማራናው ኮሺያ ቲሚርቲያ ዎዲ ኤቂዳ ታማራናው ኦሲ ቤሴና፤ ሄ ቲሚርቲ ኣዬ ጎፔ፣ ማዳና ኦሱዋፔ ሲሚያዎ፣ ያሳ ኣማኒያዎ፣ ዲንቃታቲዋባ፣ * ኮሺያ ዎሉዋባ፣ ሃይቁዋፔ ዳንዲዋባኔ ሜዲና ፒርዳባ። 3 ያሳይ ኦሊቴ ጎፔ፣ ሄዋ ኦኒ ኦሳና።

4-5 ኣዪሲ ጎፔ፣ ኢቶዳካ ፖዑ ፖዔዳዋንታኔ ሳሉዋ ኢሙዋ ባሪ ቤዔዳዋንታ፣ ቃሲ ጌሻ ኣያናካ ሻኪ ኣኬዳዋንታኔ ያሳ ቃላይ ሎዓ ጊዳዳዋ ሲሲ ኤሬዳዋንታ፣ ሲንሳፔ ያና ሳዓ ዎልቃካ ቦቹ ያሌዳዋንታ፣ 6 ሄዋፔ ጉዬ ሲሚዳ ካዳዳዋንታ ናጋራፔ ሳዔንሉዋ ዛራናዌ ዳንዳዬቴና። ኣዪሲ ጎፔ፣ ሄዋንቱ ያሳ ናዓ ማሰቃሊያ

* 5:6 ማልኪ-ዲዳቂ፣ ሃ ሱንሳይ ኤጫ ጫቁዋን ያሴቴዳዎ፣ ኢ ቁሳ ኣርኔፔ ካሴና ዳዔዳዌ ኤሬቶ ዲራሳ። ኣ ጉዬ ዛሪያባሴ ኣ ሃይቁዋባሲ ኣይኔ ጌቴቶዋ ባዎ። 7:3፤ ዶዎ 14:17-20 ያለቴ። 5:6 ማዘ 110:4 * 6:1-2 ዲንቃታቲዋባ፣ ሜቻቲዋባ ጊያዎ ጊዲዳ ጌሻቴላባ ግሪከን ዲማ ዲማ ዎጋ ጊዲያዎ ቤሴ።

ቦላ ሚሲሚሪያን ጳሪዴ ካቂያዋንታኔ አሳ ሲንላን ካዉሺያዋንቱ ማላ።

7 ኡባ ዋዴ ቡኪያ ኢራ ኡሺና፣ ጎሼዳ ኡራ ጎዒያ ካላ ሞኪያ ቢታ ያሳይ አንጃ። 8 ሺን ቡሉዋኔ ቡተዋ ሞኮፔ፣ አይኔ ጎዔና፤ ሸቃው ሸቂ ኡቲዳ። ቃሲ ዉርሴላን ጉዳታና።

9 ሺን ኑ ሲቃቶ፣ ኑኒ ሃዋዳን ሃሳዪያዋ ጊዶፔ፣ ሂንቴንቱ አቶቲላው ጊዲያ ሎዖባይ ሂንቴንቱሲ ዴዒያዋ ኤሬቶ። 10 አዪሲ ጎፔ፣ ሂንቴንቱ ኦሌዳ ኦሱዋኔ ቃሲ አማኒያዋንታ ማዴዳዋኒኔ ሃዒካ ማዲያዋን ያሳ ሲቁዳ ሲቁዋ ያሳይ ደጋናው ማካላ ጊዳና። 11 ሂንቴንቱ ሁጲያን ሁጲያን ዴማና ጊዴ፣ ሂደታን ናጊ ኡቲዳ ኩሚንላ ቱማቲላ ዉርሴላይ ጋካናው፣ ካሴዋዳን ሚኒሲዴ ኦላና ስላ አሞቲቶ። 12 ያሳይ ኢማና ጌዳዋ አማኑዋኒኔ ጌንጫን ላቲያዋንቱ ማላ ሂንቴንቱ ጊዳናዋ ኑኒ ኮዪያዋፔ አቲን፣ አዛላ ጊዳናዋ ኮዮኮ።

ያሳይ ኢሜዳ ሂደታይ ሲጳሴናዋ

13 ያሳይ አብራሃሞ ኢማና ጊዴ ጫቂዳ ዋዴ፣ ባሬፔ አጲያ ዋልቃማይ ባይና ዲራው፣ ባሬ ሁጲያን ጫቂዳ። 14 ያሳይ አ፣ «ታኒ ኔና አንጃና፤

ኔ ዜሬላካ ጮሪሳና»

ያጊዴ ጫቂዳ። 15 ሄዋዳንካ፣ አብራሃሞ ጌንጪ ናጊዴ፣ ያሳይ ኢማና ጌዳዋ አኩዳ።

16 አዪሲ ጎፔ፣ አሳይ ባሬፔ ጶቂያ ኡራን ጫቂ፤ ቃሲ ሄ ጫቂ ፓሉሚያ ኡባካ ቲዔ። 17 ሄዋ ዲራው፣ ያሳይ ባሬ ኢማና ጌዳዋ ላታናዋንቶ ባሬ ቆፋ ኡባካ ላሚናዋ ጌሺ ኦዳናው ሎይሊ ኮዪዴ፣ ሄዌ ቱማ ጊዴዳዋ ጫቂዳ። 18 ያሳይ ዋርደታናው ዳንዳዬና ሃ ላፀ ላሜቲና ዬዋቱዋን፣ ኢ ኢማና ጌዳ ኑ ሲንላን ዴዒያዋ ኦይቃናው አኮ ባቃቲዳ ኑሲ ዋልቃማ ሚንሌሉ ዳዔ።

19 ሃ ኑኒ ዴማና ጊዴ ናሼቻን ናጊ ኡቲዳዌ፣ ኑ ሸምፖ ማርካቢያ ኦይቂያ ቃፆና ቢራታ ማላ፤ ሄ ኑኒ ዴማና ጊዴ፣ ናሼቻን ናጊ ኡቲዳዌ ኤሬቲዳ ሚና ጊዲዴ፣ ጋሪዲዋ † ጊዳ ጌሻሳ ጌሌ።

20 ቃሲ ዬሱሲ ማልኪ-ፄዴቃ ሱንላቲላዳን፣ ሜጲናው ቄሳቱዋ ኡባቱዋ ካፑዋ ጊዲዴ፣ ኑ ጊሻታው ኑፔ ካሴቲዴ፣ ሄ ሳሳ ጌሌዳ።

6:8 ደዎ 3:17-18 6:14 ደዎ 22:16-17 † 6:19 ጋሪዲዋ፣ ሃዌ ዳንካኒያ ጊዲዋን ጎይናው ማዲያዋ። ሄዌካ «ጌሻሳ» ጌቲቲዳዋፔ «ጌሻፕ ጌሻሳ» ሻካናው ጎዒያዋ ጊዲዴ ቄሳቱዋ ካፖ ያላላይ ጌላናው ዳንዳዪያሳ። 6:19 ዋግ 16:2
6:20 ማዝ 110:4

7

ቄሳ ማልኪ-ዲዳቃ

1 ሃ ማልኪ-ዲዳቃ፣ ሳሌማ ካቲ፣ ኡባፔ ቦላ ያሳ ቄሳይ፣ ኣብራሃም ካቲቱም ዎጲዳ ኦላፔ ሲሚሺን፣ ኣናና ጋኬቲዳ፣ ኣ ኣንጃዳ። 2 ኣብራሃም ባሬ ኦሞዳዳ ኡባፔ ኣሲራታ ኬሲዳ፣ ኣው ኢሜዳ፤ ማልኪ-ዲዳቃ ሱንጻው ኮይሮ ቢሌላይ ዲሎቴላ ካቲያ ጊያዎ፤ ቃሲ ሳሌማ ካቲያ ኢ ጊዲያ ዲራው፣ ላዔላ ቢሌላይ ሳሮቴላ ካቲያ ጊያዎ። 3 ማልኪ-ዲዳቃው ዲያ ዎይ ኣው፣ ዎይ ኣው ዛሬያ ፓይዱ ባዎ፤ ቃሲ ኣ ዩሌታው ደሜላይ ዎይ ኣ ሃይቆ ዉርሴላይ ባዎ፤ ሺን ያሳ ናዓ ማላቲዳ፣ ሜጲናው ቄሳ ጊዳዳ።

4 ኑ ኣዎቱዎ ካፑ ኣብራሃም ኦላን ኦሞዲዳ፣ ኣሄዳዎፔ ኣሲራታ ኢሜዳ ማልኪ-ዲዳቃ ኣይ ኬና ቶቁ ጊያዌንቶ ቤዒቲ። 5 ቄሳ ጊዲያ ሌዊያ ዛራቱ ኢሰራዔሊያ ኣሳፔ፣ ሄዌኔ ባሬንቱ ጋዴ ኣሳፔ ሃራይ ኣቶ ኡንቱንቱ ኣብራሃም ዛሬ ጊደፔ፣ ኣሲራታ ኣካና ማላ፣ ሂጊያን ኣዛዜቲዲና። 6 ማልኪ-ዲዳቃ ሌዊያ ዛሬ ጊዳና፤ ሺን ኣብራሃምፔ ኣሲራታ ኣኪዳ፣ ያሳይ ኢማና ጌዳዎ ናጊያ ኣብራሃማ ኣንጃዳ። 7 ቃሲ ኣንጃያዌ ኣንጃቲያዎፔ ቶቁ ጊያዌ ፓሌንፊና።

8 ኢቲ ባጋና፣ ሃይቁያ ኣሳይ ኣሲራታ ኬሴ፤ ሺን ሃራ ባጋና ቃሲ፣ ሃይቁና ጊዳ ማርካቲያ ኡራይ ኣሲራታ ኬሴ። 9 ሃዎዲን ሃሳያናው ሃራይ ኣቶ፣ ኣሲራታ ኬሴያ ሌዊካ ኣብራሃም ባጋና ኣሲራታ ኢሜዳ። 10 ኣዩሲ ሳፔ፣ ማልኪ-ዲዳቃ ኣብራሃምና ጋኬቲያ ዎዳ፣ ሌዊ ቢሮ ዩሌቲቤና፤ ሺን ባሬ ዛሬያ ኣብራሃማ ጉልባታን ዳዔ።

11 ኢሰራዔሊያ ኣሳው ሂጊ ሌዊያ * ዜሬላቱዎ ቄሴቴላ ባጋና ኢሜቴዳ። ሄ ቄሴቴላ ኪታይ ባላይ ባይናዎ ጊደፔ፣ ኣሮናዎ ማላ ጊዳናን ማልኪ-ዲዳቃ ማላ ሃራ ቄሳይ ሱንጻታናው ኣዩሲ ኮሺ? 12 ኣዩሲ ሳፔ፣ ቄሴቴላይ ላሜቲያ ዎዳ፣ ሂጊካ ቃሲ ላሜታናው ኮሺ። 13 ሃ ዩዉ ሃሳዩቴዳ ኡራይ ሃራ ዛሬ፤ ኣ ዛሬያፔ ኦኒኔ ያርሺያሳን ቄሳዲን ኦሲቤና። 14 ኑ ጎዳይ ዩሁዳ ዛሬያፔ ዩዳዎ ኤሬቴዳዎ ጊዲያ ዲራው፣ ሙሴ ቄሳቱዎባ ሃሳዩዳ፣ ሄ ዛሬያባ ኣይኔ ሃሳዩቤና።

ኪሪሰቶሲ ማልኪ-ዲዳቃ ማላ ቄሳ

7:1 ደዎ 14:17-20 7:5 ፓይ 18:21 * 7:11 ሌዊያ፣ ሃ ሱንጻ ዴሴቲያዎንቱ ቄሳቱዎፔኔ ኣንቱንታ ማዲያዎንቱፔ ደራቴዳዎንታ።

15 ማልኪ-ዳዳቃ ማላ ሃራ ቁሳይ ዩዳዋ ጊዲንቶ፣ ሃዌ አዲዳ ኤሬታናዋ። 16 ኢ አሳ ሂጊያኒኔ ዋጋን ቁሳ ጊዲቤና፤ ሺን ዉሪና ደዑዋ ዋልቃን ቁሳ ጊዳዳ። 17 አዪሲ ጎፔ፣ ያሳ ማፃፋይ፣

«ማልኪ-ዳዳቁ ቁሳ ጊዳዳዋዳን፣

ኔኒካ ሜዲናው ቁሳ ጊዳናዋ»

ያጊዳ ማርካቱ። 18 ቤኒ ዳዲያ ሂጊ ላፋኔ ማዳናዋ ጊዲያ ዲራው አቴዳ። 19 አዪሲ ጎፔ፣ ሙሴ ሂጊ አያኔ ባላይ ባይናዋ ኦላናው ዳንዳዬና፤ ቃሲ ኑኒ አ ባጋና ያሳኮ ሺቃና ጊዳ ናሼቻን ናጊ ኡቴዳ ኡባፔ አዲያዌ ዬዳ።

20 ሄዋ ቦላን ቃሲ ያሳ ጫቁካ ዳዒ፤ ሃራቱ ቁሳ ጊዳዳ ዋዳ፣ ሄዋ ማላ ጫቁ ባዋ። 21 ሺን ዬሱሲ ጫቁዋን ቁሳ ጊዳዳ፤ ያሳይ አ፣

«ጎዳይ ጫቁዳ፤ ኢ ባሬ ቆፋ ለሚና።

«ኔኒ ሜዲናው ቁሳ ጊዳና) ጌዳ»

ያጊዳ። 22 ሄዋ ዲራው፣ ዬሱሲ ኡባፔ አዲያ ጫቆ ዋሴ ጊዳዳ።

23 ካሴ ቁሳቱዋ ፓይዲ ጮራ፤ አዪሲ ጎፔ፣ ኡንቱንቱ ኦላና ኦሱዋ ሃይቁ ዲጌዳ። 24 ሺን ዬሱሲ ሜዲናው ዳዲያ ዲራው፣ አ ቁሴቴላይ ለሚቴና። 25 ሄዋ ዲራው፣ ኢ ኡንቱንቱ ጊሻታው ጋናታናው ሜዲናው ዳዲያ ዲራው፣ ያሳኮ ባሬ ባጋና ዩያዋንታ ኡባቱዋ አሻናው ዳንዳዬ።

26 ኑሲ ጊጊያ ሃዋ ማላ፣ ቁሳቱዋ ኡባቱዋ ካፔ ዳዳናው ኮሼ፤ ኢ ጌሻ፤ አኒ ጌኒኔ ካዴሊያባይ ባዋ፤ ናጋራንቻቱዋና ኢ ጋኬቴና፤ ቃሲ ዶቃ ሳሉዋንካ ኢ ቦንቼቴዳ። 27 ሃራ ቁሳቱዋ ኡባቱዋ ካፓቱዋዳን፣ ኢ ኮይሮ ባሬ ሁጹ ናጋራሲ ያርሺዳ፣ ቃሲ ጉዬፔ አሳ ናጋራሲ ሃቼ ሃቼ ያርሻናው ኮሼና፤ ኢ ባሬና ያርሺዳ ዋዳ፣ ለዒንፊናን ኢቲ ጌዳ ያርሺዳ። 28 አዪሲ ጎፔ፣ ሙሴ ሂጊ ዳቡራንቻ አሳ ቁሳቱዋ ኡባቱዋ ካፔዋ ኡዲዳ ሱንፊ፤ ሺን ያሳይ ኢማና ጊዳ ጫቁዳ ሂጊያፔ ጉዬ ዩዳ ቃላይ ሜዲናው ባላይ ባይናዋ፣ ያሳ ናሳ ሱንፊ።

8

ዬሱሲ ኦራላ ቃላ ጫቁዋ ቁሳቱዋ ኡባቱዋ ካፔዋ

1 ኑኒ ሃሳዪያ ዋልቃማባይ ሃዋ፤ ሳሉዋን ኡባፔ ቦላ ያሳይ ኡቲያ ካዉቴላ ኦይዲያፔ ኡሼቻ ባጋና ኡቴዳ ቁሳቱዋ ኡባቱዋ

ካፑ፣ ሃዋ ማላይ ኑሲ ደዔ። 2 ጌሻ ሳዒኒኔ ቱሙ ዲንካኒያን ኢ ኦሌ፤ ሄ ዲንካኒ ኣሳይ ኤሴዳዋ ጊደናን፣ ያሳይ ኤሴዳዋ።

3 ቁሳቱዋ ኡባቱዋ ካፑ ኡባይ ኢሙዋኔ ያርሹዋ ያሳው ኢማናው ሱንሌቱዳ ዲራው፣ ሃ ቁሳቱዋ ኡባቱዋ ካፖካ ያርሻናው ኢቲባይ ደዓናው ኮሼ። 4 ሲሚ ሳዒን ኢ ደዒያዋ ጊደፔ፣ ኡባካ ቁሳ ጊደና፤ ኣዪሲ ጎፔ፣ ሂጊ ኣዛዚያዋዳን፣ ኢሙዋ ኢሚያ ቁሳቱ ደዒኖ። 5 ኡንቱንቱ ቁሳቱዋዳን ኦሊያ ኪታይ ሳሉዋን ደዒያ ኦሶ ቱሙ ለሚሱዋኔ ኤሹዋ፤ ኣዪሲ ጎፔ፣ ሙሴ ዲንካኒያ ኤሳና ሂኒሺን፣ ያሳይ ኣ፣ «ኣኩካ፤ ኡባባካ ታኒ ኔና ደሪያ ሁጺያን ቤሴዳ ለሚሱዋ ካላዳ ኦላ» ያጌዳ። 6 ሺን ዩሱሲ ጋናቲያ ጫቁ ካሴዋፔ ኣጲያዋዳንካ፣ ኣው ኢሜቲዳ ኦሱካ ኡንቱንቱዋፔ ኣጴ፤ ኣዪሲ ጎፔ፣ ሄ ጫቁ ያሳይ ኢማና ጌዳ ኡባፔ ኣጲያ ኪታን ኦሴቲዳ።

7 ኣዪሲ ጎፔ፣ ኮይሮ ጫቁዋን ባላይ ባይናዋ ጊዲንቶ፣ ላዒንሶ ጫቁዋ ኮሼና። 8 ሺን ኡንቱንታ ቦሪዳ፣ ጎዳይ ሃዋዳን ያጌ፤

«ታኒ ኢሰራዔሊያ ኣሳና ኢሁዳ ኣሳና ኦራላ ጫቁዋ ጫቁቲያ ጋላሳቱ ያናዋ።

9 ሄ ጫቁ ታኒ ጊብፃ ጋዲያፔ ኡንቱንቱ ኣዋቱዋ ኩሺያ ኦዪቃዳ፣ ጎቻ ኬሴዳ ዎዳ፣ ኡንቱንቱና ጫቁቲዳ ጫቁዋ ማላ ጊደና።

ኡንቱንቱ ታ ጫቁዋን ኣማኔቲቤና ዲራው፣ ታኒካ ኡንቱንታ ኣጋዲ። ታኒ፣ ጎዳይ፣ ሃዋ ኦዳይ።

10 ኣዪሲ ጎፔ፣ ሄ ጋላሳቱዋፔ ጉዪያን፣ ታኒ ኢሰራዔሊያ ኣሳና ጫቁታና ጫቁ ሃዋ።

ታኒ ታ ሂጊያ ኡንቱንቱ ቆፋን ዎላና፤ ቃሲ ኡንቱንቱ ዎዛናንካ ፃፋና።

ታኒ ኡንቱንቱ ያሳ ጊደና፤ ኡንቱንቱካ ታ ኣሳ ጊደና። 11 ኡንቱንቱፔ ኦኒኔ ባሬ ሸሩዋ

ዎይ ባሬ ኢሻ፣ ሳዳ ኤራ» ያጊዳ ታማሪሴና።

ኣዪሲ ጎፔ፣ ኡንቱንቱ ናዓፔ ጨማ ጋካናው ኡባይ ታና ኤሪና።

12 ታኒ ኡንቱንቱ ናቁዋ ማራና፤ ኡንቱንቱ ናጋራካ ላዒንሶ ሃሳዪኬ» ያጌ። 13 ያሳይ ኦራላ ጫቁዋ ጊዳ ሃሳዪያዋን ኮይሮዋ ኤጨሴዳ፤ ቃሲ ኤጨያባዪኔ ዉሪያባይ ኤሌካ ጳያና።

9

ሳሉዋን አሴቲያ አያና አሱ ሳዓን አሴቲያ አያና አሱዋፔ አዲ

1 ኮይሮ ጫቆ ያሳው ጎዩኒያ ዋጋይኔ አሳይ አሌዳ ጌሻ ጎሊ ደዔ። 2 አዩሲ ጎፔ፣ ኮይሮ ዲንካኒ ኤቁዳ፤ አ ጊዲዋን ሙቃዳ ዋሊያዊ፣ ፃራጳዛይኔ ጎዳ ሲንሳን ዋሊያ ኡኪላይ ደዔ፤ ሄ ሳዓይ ጌሻሳ ጊዳ ፃሴቲ። 3 ላዔንሉ ጋሪዲዋ ጉዬ ባጋና ኡባፔ አዲያ ጌሻ ሳዓ ንቴቲያ ዲንካኒ ደዔ። 4 አ ጊዲዋን ኢፃና ጨዋያናው ዋርቃፔ አሌዳ ሳዒኒኔ ኡባሳና ዋርቃን ሼሼዳ ቃላ ጫቁዋ ታቦታይ ደዔ። ሄ ቃላ ጫቁዋ ታቦታን ማናይ ደዔያ ዋርቃ ፃሩ፣ አሮና ፃምዓይ አጩዳዊኔ ቃሲ ሙሴ ሂጊ ፃፊቲዳ ላዑ ማሴቲዳ ሹቻቲ ደዒና። 5 ሄ ቃላ ጫቁዋ ታቦታፔ ቦላ ባጋና አቶ ጊያ ሳዓ ቁምዒያ ባሬንቱ ቁፊያን ጌንሊያ ቦንቾ ከሩቤቱ ደዒና፤ ሺን ሃ ኡባባ ሃዒ ዉርሲ አደናው ዳንዳዮኮ።

6 ሄዋ ሄዋዳን ጊሊ ደዒሺን፣ ቁሳቲ ኡባ ዋዳ፣ ባሬንቱ አሱዋ አላናው ኮይሮ ዲንካኒያ ጌሊና። 7 ሺን ቁሳቲዋ ኡባቲዋ ካፑዋ ፃላላይ ላዔንሉ ዲንካኒያ ላይላፔ ኢቲ ጌዴ ጌሊዴ ባሬ ዲራዉኔ ኤሬናን አሳይ አሌዳ ናጋራ ዲራው፣ ያሳው ያርሺያ ሱላ አኪዴ ጌሌ። 8 ኮይሮ ዲንካኒ ኤቁ ደዒሺን፣ ኡባፔ አዲያ ጌሻ ሳዓ አፊያ ኦጊ ቢሮ ዶዬቲቤናዋ ጌሻ አያናይ ሄዋን ኤሪሰ።

9 ሄ ዲንካኒ ሃ ዋዳው ሌሚሱዋ፤ ሄዋ ጊያዋ ያሳው ኢሚያ ኢሙኔ ያርሹ ጎዩኒያዋ ሱሬ ዋዛና ባላይ ባይናዋ አላናው ዳንዳዩኪና። 10 ሄዋንቱ ሙሳባ፣ ኡሻባኔ ደማ ደማ ሚቻባ ኦዲያ ካሬ ባጋ ዋጋቱዋ፤ ኡንቱንቱ ኦሪዲያ ዋዲ ጋካናው አሴቲያ ዋጋቱዋ።

11 ሺን ከሪሰቶሲ ሃዋን ደዒያ ሎፆባው ቁሳቲዋ ኡባቲዋ ካፑዋ ጊዲዳ ዩዲጌዳ። ኢ ጌሊዴ አሊያ ዲንካኒ ኡባፔ አዲያዋኔ ባላይ ባይናዋ፤ ቃሲ ሄ ዲንካኒያ አሳይ አሊቤና፤ ሃ ሜዲቲዳ ሳዓባካ ጊዳና። 12 ከሪሰቶሲ ኡባፔ አዲያ ጌሻ ሳዓ ጌሊያ ዋዳ፣ ዳሻ ሱላኔ ጋሎ ማራ ሱላ ኦይቁዴ ጌሊቤና፤ ሺን ባሬ ሱላ ኦይቁዴ፣ ኑሲ ሜዲና አቶቲላ ኢሚዴ፣ ላዔሌናን ኢቲ ጌዴ ጌሌዳ። 13 ቱኔዳ አሳ ቦላ ኮሩማ ሱላኔ ዳሻ ሱላ ጫጫፊዴ፣ ጉዳቲዳ ኡሳቲ ቢዲንላ ቆለና፣ ሄ ኡራ ቱናቲላፔ ጌሻናው ዳንዳዮፔ።

9:2 ኬስ 26:1-30፤ 25:31-40፤ 25:23-30 9:3 ኬስ 26:31-33 9:4 ኬስ 30:1-6፤ 25:10-16፤ 16:33፤ ፓይ 17:8-10፤ ዛር 10:3-5 9:5 ኬስ 25:18-22
9:6 ፓይ 18:2-6 9:7 ዋግ 16:2-34 9:13 ዋግ 16:15-16፤ ፓይ 19:9፣ 17-19

14 ሜዲና ጌሻ አያና ባጋና ባላይ ባይና ያርሹዋዳን፣ ያሳው ባሬና ኢሚዳ ኪሪሰቶሲ ሱላይ፣ ኑኒ ዴቦቆ ያሳው አላና ማላ፣ ካሴ ኑ ሃይቄዳ ኦሱዋፔ ኑ ሱሪ ዋዛና ዋቲ ጌሻንዳሻ!

15 ሄዋ ዲራው፣ ያሳይ ዪሴዳዋንቱ ኢ ኢማና ጌዳ ሜዲና አንጃዋ ላታና ማላ፣ ኪሪሰቶሲ ኦራላ ጫቆ ጋናቲዳ፤ ሄዌ ሃናና ዳንዳዪያዌ፣ አሳይ ኮይሮ ጫቁዋፔ ጋርሳን ዴዲዴ ኦሌዳ ባላ አይሌቴላፔ ኬሲያ ሃይቁ ዳዲያ ዲራሳ።

16 አዪሲ ጎፔ፣ ሃይቁያ ኡራይ ዋይቲዳዌ ዳዎፔ፣ ሄ ኡራይ ሃይቆዌ ኤሪታናው ኮሼ። 17 አዪሲ ጎፔ፣ ዋይቲዳ ኡራይ ሃይቁዳ ዋዳ፣ ኢ ዋይቲዳዌ ፖሌቲዳ፤ ሄ ዋይቲዳዌ ፓዓ ዳዲሺን፣ አይኔ ፖሌቲና።

18 ሃራይ አቶ፣ ኮይሮ ጫቁካ ሱላይ ባይናን አንጃቲቤናዌ ሃዋሳ። 19-20 አዪሲ ጎፔ፣ ሂጊያን ዳዲያ አዛዙዋ ኡባ ሙሴ አሳ ኡባው ኦዳዳ፤ ሄዋፔ ጉዪያን፣ ጋሎ ማራ ሱላይ ዳሻ ሱላይ፣ ሃላና፣ ዘዎ ዶርሳ ኢሲኪያናኔ ሂሶጲያ ጊያ ሚላ ቦንጨያና አቲፔ አኪዴ፣ «ሃዌ ሂንቲንታ ያሳይ አዛዜዳ ጫቁዋ ሱላይ» ያጊዴ፣ ሂጊያ ማፃፋ ቦላኔ አሳ ኡባ ቦላ ጫጫፊዳ። 21 ሄዋዳንካ፣ ዳንካኒያ ቦላኔ ኦሊያ ሚሻ ኡባ ቦላ ሱላይ ሙሴ ጫጫፊዳ። 22 ሂጊ ጊያዋዳን፣ ቱሙካ አማሬዳዋፔ አቲን፣ ኡባባይካ ሱላይ ጌዬ፤ ሱላይ ጉካና ቆዮፔ፣ አቶቴላይ ባዎ።

ኪሪሰቶሲ ያርሹቲዳዌ ናጋራ ቁጩ ቆዪሴ

23 ሄዋ ዲራው፣ ሳሉዋን ዳዲያዋንታ ማላቲያዋንቱ ሄ ያርሹዋን ጌያናው ኮሼ፤ ሺን ሳሉዋን ዳዲያዋንቱካ ባሬንቱ ሁጹው ጌያናው አዲያ ያርሹዋ ኡንቲንታ ኮሼ።

24 አዪሲ ጎፔ፣ ኪሪሰቶሲ ቱሙ ጌሻሳን ለሚሴቲያ አሳይ ኦሌዳ ጌሻሳ ጌሊቤና፤ ሺን ኢ ሃዲ ኑ ጌሻታው ያሳ ሲንላን ቤታናው ያ ሳሉዋ ጌሌዳ። 25 ቁሳቱዋ ኡባቱዋ ካፑ ላይላን ላይላን ባሬ ሱላይ ጊዴናዋ ኦይቁዳ፣ ጌሻ ሳዓ ጌሊያዋዳን፣ ኪሪሰቶሲ ባሬና ኡባዳ ያርሻናው ጌሊቤና። 26 ሄዋ ጊዲንቶ፣ ኪሪሰቶሲ ሳሳይ ሜዴቶዴፔ ዶሚዴ ዳሮ ጌዴ ዋይታናው ኮሼ፤ ሺን ሃዲ ዋዲያ ወርሴላን ናጋራ ቆዪሳናው ባሬና ያርሹዴ፣ ላዔሌናን አቲ ጌዴ ቤቴዳ።

27 አሳይ ኡባይ አቲ ጌዴ ሃይቃናው ቤሴ፤ ሄዋፔ ጉዪያን ያሳይ አሳ ፒርዳና። 28 ሄዋዳንካ፣ ቃሲ ኪሪሰቶሲ ዳሮ አሳ ናጋራ

ጳጳሳናው ኢት ጌዳ ያርሼቲዳ፤ ቃሲ ኢ ባሬና ሎይሊ ናጊያዋንታ ኣሻናው ቤታናፕ ኢትን፣ ላዔንሖ ናጋራ ቶካናው ቤቴና።

10

1 ኣዪሲ ጎፔ፣ ሂጌው ያና ሎዖባ ኤሹዋ ፃላላይ ዳዔ፤ ኣው ቱሙ ለሚሱ ባዋ። ኡባ ዎዳ ላይላን ላይላን ኢት ማላ ያርሹ ያርሼቲ፤ ሄዋ ዲራው፣ ሂጊ ያሳኮ ሸቂያ ኣሳ ሄ ያርሹዋን ባላይ ባይና ኣሳ ኦላናው ኡባካ ዳንዳዬና። 2 ያሳው ጎዪኒያ ኣሳይ ባሬ ናጋራፕ ኡባና ጌዬዳባ ጊዲንቶ፣ ሱሬ ዎዛናን ላዔሉዋ ናጋራ ቆፔና፤ ቃሲ ያርሺያዎካ ኣጋና። 3 ሺን ኣሳይ ላይላን ላይላን ሄ ያርሹዋን ባሬ ናጋራ ሃሳዬ። 4 ኣዪሲ ጎፔ፣ ኮሩማ ሱላይኔ ዳሻ ሱላይ ናጋራ ጳጳሳናው ኡባካ ዳንዳዬና።

5 ሄዋ ዲራው፣ ኪሪሰቶሲ ሃ ኣላሚያ ያና ሃኒዴ፣ ሃዋዳን ያጌዳ፤

«ኔኒ ያርሹዎኔ ኢሙዋ ኮያቤይካ፤

ሺን ታው ቦላ ጊጊሳዳ።

6 ኔኒ ፀጊያ ያርሹዋንኒ

ናጋራ ያርሹዋን ኡባካ ናሼታካ።

7 ታኒ ሄ ዎዳ፣ ሳላ ማፃፃን ታባይ ፃፊቲዳዋዳንካ፣

ያሳው፣ ታኒ ኔኒ ኮዪያዋ ኦላናው ያዲ፣ ያጋዲ»

ያጌዳ። 8 ያርሹ ያርሼታና ማላ፣ ሂጊ ኣዛዚያዎ ጊዶፔ፣ ኪሪሰቶሲ ኮይሮ፣ «ኔኒ ያርሹዎ፣ ኢሞታ፣ ፀጊያ ያርሹዎኔ ናጋራ ያርሹዎ ኡባካ ኮያቤይካ፤ ሄዋንቱን ናሼታካ» ያጌዳ። 9 ሄዋፕ ጉዪያን ኪሪሰቶሲ፣ «ያሳው፣ ታኒ ኔኒ ኮዪያዎ ኦላናው ያዲ» ያጌዳ። ሄዋ ዲራው፣ ኪሪሰቶሲ ላዔንሉዋ ኤሳናው ኮይሮዋ ጳጳሴ። 10 ዬሱሲ ኪሪሰቶሲ ያሳይ ኮዬዳዋ ኦሉዳ ዲራው፣ ባሬ ኣሹዋ ላዔንሉናን ኢት ጌዳ ያርሼዳዋን ኮኒ ኑ ናጋራፕ ጌዪ ኣጌዳ።

11 ቄሳቱዋ ኡባቱ ሃቺ ሃቺ ኤቂዳ፣ ባሬ ኦሱዋ ኦሊና፤ ቃሲ ናጋራ ጳጳሳናው ኡባካ ዳንዳዬና ኢት ማላ ያርሹዋ ዛሪ ዛሪዳ ያርሺና። 12 ሺን ኪሪሰቶሲ ናጋራ ዲራው፣ ኡባ ዎዳው ጊዳዳ ኢት ያርሹዋ ያርሺዳ፣ ያሳፕ ኡሼቻ ባጋና ኡቲ ኣጌዳ። 13 ያሳይ ሰንላፕ ኪሪሰቶሳ ሞርኬቱዋ ኪሪሰቶሳው ጌዲያን ዬዲያዎ ኦላና ጋካናው፣ ያኒ ናጌ። 14 ኣዪሲ ጎፔ፣ ኢ ኢት ጌዳ ያርሼዳዋን፣ ናጋራፕ ጌዬዳዋንታ ሜዲናው ባላይ ባይናዋንታ ኦሉዳ።

15 ቃሲ ጌሻ ኣያናይ ኑሲ ማርካቲዳ፣ ሃዋዳን ያጌ፤

9:28 ኢሳ 53:12 10:5 ማዝ 40:6-8 10:11 ኪስ 29:38 10:12 ማዝ 110:1

16 «ታኒ ሄ ጋላሳቱዋፔ ጉዪያን፥
 ኢንቱንቱና ጫቄቲያ ጫቄ ሃዋ፥
 ታኒ ታ ሂጊያ ኢንቱንቱ ቆፋን ዋፋና፤
 ቃሲ ኢንቱንቱ ዋዛናንካ ፃፋና»
 ያጌ። 17 ቃሲ ሂዋፔ ጉዪና፥

«ታኒ ኢንቱንቱ ናጋራኔ
 ኢንቱንቱ ማካላ ኦሱዋ ላዔንሉ ሃሳዪኬ»
 ያጌ። 18 ያሳይ ሄ ናጋራ አቶ ጌዳ ዋዴ፥ ናጋራ ጳዪሳናው ሃዋፔ
 ሲንላው ያርሹዋ ኮሼና።

ያሳኮ ሺቃናው ኮሼ

19 ሲሚ ታናዳን አማኒያዋንቶ፥ ኩኒ ዬሱሳ ሱላ ባጋና ኡባፔ
 አጂያ ጌሻ ሳባ ጌላናው ኮሲ ያላቲላይ ዴዔ። 20 ኪሪሰቶሲ ኮሲ
 ኦራላ ኦጊያኔ ዴዐ-ዋ ኦጊያ ጋሪዲ-ዋ ባጋና፥ ሄዋ ጉሳይ ባሬ ቦላ
 ባጋና ደዬዳ። 21 ኮሲ ያሳ ጎሊን ሱንጭቲዳ ዋልቃማ ቄሳይ ዴዒያ
 ዲራው፥ 22 ኩኒ ሱሬ ዋዛናና፥ ቱሙ አማኑዋና፥ ኢታ ዋዛናፔ
 ጌዬዳ ዋዛናናኔ ቃሲ ዲሎ ሃላን ሚጨቴዳ ቦላና ያሳኮ ሺቆይቱ።

23 ኮሲ አማና ጌዳ ያሳይ አማንሊያ ዲራው፥ ኩኒ ዴማና ጊዴ
 ናሽቻን ናጊ ኡቲዳዋ ሎይሊ ኦይቆይቱ። 24 ኢቱ ኢቱዋና ዋኒ
 ሲቁታኔንቶኔ ቃሲ ሎዎ ኦሱዋ ዋቲ አላኔንቶ፥ ኢቱ ኢቱዋሲ ቆፕቶ።
 25 ኢቱ ኢቱ ሸቁዋ ዶያ ኡዲዴ ሸቁያዋዳን፥ ኩኒካ ኢቲፔ ሸቁያዋ
 አጎኮ፤ ሸን ጎዳ ጋላሳይ ማታቲያዋ ሂንቲንቱ ቤዒያ ዲራው፥ ኢቱ
 ኢቱዋ ማንጭቶ።

26 ኩኒ ቱማቲላ ኤራ ኣኪዲጊዴ፥ ኤሪዴ ናጋራ አሊያዋ ጊደፔ፥
 ሃዋፔ ሲንላው ናጋራ ጳዪሲያ ያርሹ ኢቲባይኔ ባዋ። 27 ሸን ያሺያ
 ፒርዳ ናጊያዌኔ ያሳ ኢጂያ ኡባ ማናው ዋልቃማ ታማይ ዴዔ።
 28 ሙሴ ሂጊው አዛዜቲና ኡራይ፥ ላዐ ኡራይ ዋይ ሂዙ ኡራይ
 አ ቦላ ማርካቶፔ፥ ቃሬቲ ባይናን ሃይቁ። 29 ያሳ ናባ ካጄዳ
 ኡራይ፥ ባሬና ናጋራፔ ጌሼዳ ያሳ ጫቁዋ ሱላ ቱናባዳን ቆፕዳ
 ኡራይ፥ ቃሲ አጶ ኬካቲላ ጌሻ ኢያና ቦሪያ ኡራይ፥ ኣይ ከና ኢታ
 ፒርዳ አካናው ቤሲንቶኔ ኣኔ ቆፒፔ።

30 አዪሲ ጎፔ፥ «ታኒ ሃሉዋ ኬሳናኔ ኩሺያ ዛራና» ጌዳዋ ኩኒ
 ኤሬቶ፤ ቃሲካ፥ «ጎዳይ ባሬ ኣሳ ፒርዳና» ያጌዳ። 31 ዴዐ-ዋ
 ያሳ ኩሺያን ኩንዳናዊ ዳሮ ያሺያዋ።

10:16 ኤርሞ 31:33 10:17 ኤርሞ 31:34 10:22 ዋግ 8:30፤ ሂዘ
 36:25 10:27 ኢሳ 26:11 10:28 ዛር 17:6፤ 19:15 10:29 ኬሰ
 24:8 10:30 ዛር 32:35፣ 36

32 ሂንቴንቴሲ ያሳ ፖዑ ፖዔዳዋፔ ጉዩያን፣ ሂንቴንቴ ዳርባን ዋዩቲዳ፣ ዋልቃማ ዋዴታን ገንጨዳ ቤኒ ዋዲያ ሃሳዩቲ። 33 ኢቲ ኢቲ ጌዴ ሂንቴንታ አሳ ሲንላን ቦሬዲኖኔ ፓፃ ካዔዲኖ፤ ቃሲ ሃራ ዋዴ ሄዋዳን አጭዳዋንቴናኔ ኢቲፔ ዴዔዲታ። 34 አዩሲ ሳፔ፣ ቃሹዋን ዴዔያ አሳቱዋሲ ሂንቴንቴ ቃሬቲዲታ፤ ያቲዴ ሂንቴንቴሲ ሜዲናው ዉሬና ኡባፔ አዲያ ሻሉ ሳሉዋን ዴዔያዋ ሂንቴንቴ ሁጳው ኤሬዳ ዲራው፣ ሂንቴባ ኡባ አከዲሳፔ ሂዶታን ገንጨዲታ።

35 ሄዋ ዲራው፣ ዋልቃማ ዋዩታና ዴዔያ ሂንቴንቴ ዓላቲላ አሎፒቲ። 36 ያሳይ ኮዩያዋ ኡዲዴ፣ ኢ ሂንቴንቴሲ ኢማና ጌዳዋ አካናው ገንጨና ኮሼ። 37 አዩሲ ሳፔ፣ ያሳ ማፃፋይ፣ «አማራዳ ዋዲ አቲዳ።

ዩያዌ ያናዋ፤ ጋሚዔና። 38 ታ ዓሉ አማኔቲዴ ዴዓናዋ። ሺን ኦኒኔ ጉዩ ሲሞፔ፣ ታና ናሼቹና»

ያጌ። 39 ኑኒ አማኔቲዴ አቲዳዋንቴ ባጋ ጊዲያዋፔ አቲን፣ ጉዩ ሲሚዴ ቆዩዳዋንቴ ባጋ ጊዶኮ።

11

አማኑዋ

1 አማኑዋ ጊያዌ፣ ዴማና ጊዴ ናሼቻን ናጊ ኡቲዳባይ አማንሊያዋኔ ቤዓናው ዳንዳዩናባ ኤሪሲያዋ። 2 ያሳይ ቤኒ ጨማ አሳው ማርካታዌ፣ ኡንቴንቴ አማኔዳዋና።

3 ሳሉኔ ሳዓይኔ ያሳ ቃላን ሜዴቲዳዋ አማኑዋን ኑኒ ኤሬቶ፤ ሄዋ ዲራው፣ ቤቲያባይ ቤቲናባፔ ሜዴቲዳ።

4 አቤል ቃዔላዋፔ አዲያ ያርሹዋ ያሳው ያርሹዳዌ አማኑዋና። ያሳይ አ ኢሙዋባ ማርካቲዳ፣ ኢ ዓሉዋ ጊዴዳዋካ ማርካቲዳ፤ አቤል ሃራይ አቶ ሃዩቄዳሺንካ፣ ባሬ አማኑዋን ሃዒ ጋካናው ሃሳዩ።

5 ሄናኪ ሃይቄናን ሳሉዋ ቤዳዌ አማኑዋና፤ ያሳይ አፊዳ ዲራው፣ ኦኒኔ አ ቤዓናው ዳንዳዩቤና። ያሳ ማፃፋይ፣ «ሄናኪ ሳሉዋ ባናፔ ካሴ ያሳ ናሼቹዳ» ያጌ። 6 አማኑ ባይናን ኦኒኔ ያሳ ናሼቻናው ዳንዳዩና፤ አዩሲ ሳፔ፣ ያሳኮ ዩያ ኦኒኔ ያሳይ ዴዔያዋኔ ባሬና ኮዩያዋንቶ ዋይታ ኢሚያዋ አማናናው ኮሼ።

10:37 እምብ 2:3-4 11:3 ዶም 1:1፤ ማዝ 33:6፣ 9፤ የህ 1:3 11:4 ዶም 4:3-10 11:5 ዶም 5:21-24

7 የሄ ቤዓናው ዳንዳዬና ሲንሳፔ ሃናናባው ያሳይ፡ «ኔና ናጋ» ገና፡ ያሳው ያዪዳ፡ ባሪናኔ ባሪ ሶይ አሳ አሻናው ማርካቢያ ማዴዳዊ አማኑቀና፤ ያቲዳ ሄቀን ሃ ሳዓ ቦላ ፐርዲዳ፡ አማኑቀን ቤቲያ ያሎቴሳካ ያሳፔ አኬዳ።

8 አብራሃም ላታናዳን፡ ያሳይ ባሪው አማና ጌዳ ጋዲያ ባና ማላ፡ ያሳይ ባሪና ያሴዳ ዎዳ፡ አዛዜቲዳዊ አማኑቀና፤ ኢ ባሪ ጋዲያፔ ኬሲዳ ቢያ ዎዳ፡ ሃቃ ቢንቶኔ ኤሪናን ኬሴዳ።

9 አብራሃም ያሳይ ባሪው አማና ጌዳ ጋዲያን ሃራ ቢታ አሳዳን ዴዴዳዊ አማኑቀና፤ ያሳይ ሄ አማና ጌዳዋ ባሪናና ኢቲፔ ላታና ዪሳቃናኔ ያዪቆባና ዲንካኒያን ዴዴዳ። 10 አዪሲ ጎፔ፡ አብራሃም ያሳይ ሎዎ ባሱቀን ቆፒዳ ከያዳ ካታማ ናጌ።

11 ሳራ ባሪ ሁጳው ሃራይ አቶ ኤጫዳካ፡ አማና ጌዳ ያሳይ አማኔቲዳዋ ገዴዳዋ ኤሪዳ ዲራው፡ ናዓ ሻሃራናው ዎልቃ ዴማዳዊ አማኑቀና። 12 ሄቀ ዲራው፡ ሃይቄዳ አሳ ማላቲያ ኢቲ ቢታኒያፔ ሳሎቀን ዴዴያ ያለንቲያ ከና፡ አባ ጋፃን ዴዴያ ፓይዳ ባይና ሻጋያ ከና ዛሪቱ ዬሌቲዲና።

13 ሄ አሳቲ ኡባቲ አማኑቀን ሃይቄዲና፤ ባሪንቶ ያሳይ አማና ጌዳዋካ አኪቤይኪና፤ ሺን ሃኩቀን ሄቀ ቤዒዳ፡ ሳሮቲዲና። ቃሲ ኡንቲንቲ ሳዓን አማላኔ ዬዴሪሴቲዳ ኬሴዳ አሳቲቀ ገዴዳዋ ኤሪዲና። 14 አዪሲ ጎፔ፡ ሄቀዳን ገያ አሳቲ ባሪንቲ ሁጳ ጋዲያ ኮዪያዎ ኤሪሲና። 15 ኡንቲንቲ ሄ ዬጌዳ ኬሴዳ ጋዲያ ሲማናው ቆፐዳዋ ገዲንቶ፡ ጉዬ ሲሚያ ካጫ ዴማናን አገኪና፤ ሺን 16 ኡንቲንቲ ሄቀ አገዳ፡ ሎዒያ ጋዲያ ላሞቲና፤ ሄቀ ሳሎቀ ጋዲያ። ሄቀ ዲራው፡ ያሳይ ኡንቲንቲ ያሳ ጌቲታናው ዬላቴና።

17-18 አብራሃም ዪሳቃ ያርሻኔንቶ ዎይ ያርሼኔንቶ፡ ያሳይ ኤራናው ዎሞሴዳ ዎዳ፡ አብራሃም አማኑቀን አ ያርሼዳ። ያሳይ አብራሃማ፡ «ኔ ዛሪ ዪሳቃ ባጋና ያሴታናዋ» ጌዳሺንካ፡ አብራሃም ባሪ ናዓ ዪሳቃ ያርሻናው ገጌዳ። 19 አብራሃም ያሳይ ዪሳቃ ሃራይ አቶ፡ ሃይቄዋፔካ ፓላናው ዳንዳዪያዎ ኤሪዳ፤ ሄቀ ዲራው፡ ሃይቄዋፔ ጉዬ አ ዛሪዳ አኬዳ።

20 ዪሳቂ ሲንሳፔ ሃናናባው ያዪቆባኔ ኤሳ አንጃዳዊ አማኑቀና።

11:7 ደም 6:13-22 11:8 ደም 12:1-5 11:9 ደም 35:27 11:11 ደም 18:11-14፤ 21:2 11:12 ደም 18:11-14፤ 21:2 11:13 ደም 23:4፤ 1ኦድ 29:15፤ ማዝ 39:12 11:17-18 ደም 22:1-14 11:20 ደም 27:27-29፣ 39-40

21 ያዪቆቢ ሃይቃና ሃኒዳ፡ ዮሴፎ ናና ሁጲያን ሁጲያን እንጂዳዊን ጋቲማን ጉፊቲዳ፡ ያሳው ጎዩኔዳዊ አማኑዋና።

22 ዮሴፎ ሃይቃናው ማቲዳ፡ ኢሰራዔሊያ አሳይ ጊብጻፔ ኬሳናዋ ሃሳዬዳዊን ባሬ ሜቄላ ኦላናባ ኡንቱንታ አዛዜዳዊ አማኑዋና።

23 ሙሴ ዩሌቴዳዋፔ ጉዩያን፡ አዉኔ አታ ማላ ሎዖ ናባ ጊዳዳዋ ቤዒዳ፡ ሄዙ አገና ቆሴዳዊ አማኑዋና፤ ኡንቱንቱ ካቲያ አዋጅካ ያዩቤይኪና።

24 ሙሴ ዲጩዳዋፔ ጉዩያን፡ ጊብጻ ካቲያ ናቲ ናባ ጌቴታናዋ ኢዳዳዊ አማኑዋና። 25 ናጋራን ሙሴ ጉላ ዋዲያ ናሽታናዋፔ፡ ያሳ አሳና ዋዬታናዋ ዶራዳ። 26 ዋዴፔ ዳማና ዋይታ ኢ ቲሺ ኡዲዳ ያሎ ዲራው፡ ጊብጻ ጋዲያ ሻሉዋ ኡባፔ ከሪሰቶሳ ዲራው ቦሬቲያዊ ዳሮ አጲያ ዲሬቴላ ጊዳዳዋ ቆፔዳ።

27 ካቲያ ሃንቆ ሙሴ ያዩናን፡ ጊብጻ ጋዲያፔ ኬሴዳዊ አማኑዋና፤ አዪሲ ጎፔ፡ ቤቴና ያሳ ቤዒዳዋዳን፡ ጌንጨዳ ሲንላው ቤዳ። 28 ሃይቁዋ ከታንቻይ ኢሰራዔሊያ አሳው ባይራ ናና ቦቹናዳን፡ ሙሴ ፓሲጋ ቦንቹዳዊን ጉባኒያን ሱላ ጫጫፊሴዳዊ አማኑዋና።

29 ኢሰራዔሊያ አሳይ ሜላ ቢታን ሃሜቲያዋዳን፡ ዘዖ አባ ፒኔዳዊ አማኑዋና፤ ሺን ጊብጻ አሳቱ ፓጩው ጌሊሺን፡ ሃላይ ኡንቱንታ ሚቲ አጌዳ።

30 ኢሰራዔሊያ አሳይ ኢያርኮ ጊያ ካታማ ሹቻ ዲርሳ ላፑ ጋላሳ ዩዩ ዩዩ አጲዋፔ ጉዩያን፡ ሄ ሹቻ ዲርሳይ ኩንዴዳዊ አማኑዋና። 31 ጫራታ ራዓባ ዩዉዋ ቆሪያዋንታ ሎይላ ሞኬዳ ዲራው፡ ያሳው አዛዜቴናን ኢዳዳ አሳና ሃይቁናን አቴዳዊ አማኑዋና።

32 ሲሚ ሃራባ ጉጃዳ አያ ኦዶ? ጌዶናባ፡ ባራቃባ፡ ሳሚሶናባ፡ ዮፍታሃባ፡ ዳዊቲባኔ ሳሜላባ፡ ቃሲ ናባቱዋባ ኦዳናው ታው ዋዲ ጊዳና። 33 ኡንቱንቱ ካቲያ ኡባና ኦሌቲዳ ያኔዳዊን ያሎባ ኦሌዳዊ አማኑዋና፤ ያቲዳ ያሳይ ኢማና ጌዳዋ አኬዲና፤ ጋሞቱዋ ዶናካ ጎርዳዲና። 34 ዋልቃማ ታማ ቶዩሴዲና፤ ኩሳ ማሻፔ አቴዲና፤ ኡንቱንቱ ዳቡራንቻ፤ ሺን ሚኔዲና፤ ቃሲ ኦላን ሚኒዳ፡

11:21 ዶም 47:31 11:22 ዶም 50:24-25፤ ኬስ 13:19 11:23 ኬስ 2:2፤ 1:22 11:24 ኬስ 2:10-12 11:28 ኬስ 12:21-30 11:30 ኢያ 2:1-21፤ 6:22-25 11:32 ዳት 6:11-8:32፤ 4:6-5:31፤ 13:2-16:31፤ 11:1-12:7፤ 1ሳም 16:1-1ካ 2:11፤ 1ሳም 1:1-25:1 11:33 ዳን 6:1-27

ሃራ ጋዲያ አላ አሳ ዩዳርሴዲኖ። 35 ማጫዋንቱ ባሬንቱ ሃይቁዳዋንታ ሃይቁዋፔ ዳንዲና ኣኬዲኖ።

ቃሲ ሃራንቱ ቃሹዋፔ ቢሌታናዋ ኢዲዳ፣ ኬኪያ ዳዖ ሃይቁዋፔ ዳንዳናው፣ ኡጋቲዳ ሃይቁዲኖ። 36 ሃራቱዋ ቦላ አሳይ ቁሊጪ ካዔዳ፤ ሊሱዋን ሾጩቴዲኖኔ ሳንላላታን ቃሼቲዳ፣ ቃሹ ጎሊያ ጌሌዲኖ። 37 ሹቻን ጫዳቴዲኖ፤ ማጋዚያን ላዑ ኬሲዳ ጳልቁቴዲኖ፤ ፓጩቴዲኖ፤ ማሻን ሃይቁዲኖ፤ ኡንቱንቶ ኡባባይካ ጳዩና፣ ዋዬቲዳ ቱጋቲዳ፣ ዶርሳ ጫላኔ ዳሻ ጫላ ማዩዳ ዩዩዲኖ። 38 ኡንቱንቱሲ ሃ አላሚ ጊጌናን ኢዲና፣ ዋራን፣ ዳሪያን፣ ጎንጎሉዋ ጊዶኒኔ አላ ጊዲዋን ዩዩዲኖ።

39 ያሳይ ኡንቱንቱ አማኑዋ ማርካቶፔካ፣ ሄዋንቱ ኡባቱ ኢ፣ አማና ጌዳዋ ኣኪቤይኪኖ። 40 ያሳይ ኑሲ አቲ ሎዖ ቆፋ ቆፔ ዋጴዳ ዲራው፣ ኡንቱንቱ ኑኒ ባይናን ባላይ ባይናዋንታ ጊዲኪኖ።

12

ያሳይ ኑሲ አዉዋ

1 ሲሚ ኑሲ ሃዋ ኪና ዳሮ አሳይ፣ ሻሪያዳን ኑ ማታን ዩዩ አዲዳ ማርካቲያዋ ዳዒሸን፣ ኑና ቆቢያ ኡባባኔ ባቂ ኦይቂያ ናጋራ ዲጊዳ ኑ ሲንሳን ዳዒያ ኑኒ ዋፃና ዋሳ ጌንጪዳ ዋይይቲ። 2 ኑኒ ኑ አማና ኦጊያ ዶዩዳዋኔ ፖሊሲያዋ ጊዳዳ ዩሱሳ ዩሎቴ። ዩሱሲ ዩላ ካዲዳ፣ ሲንሳፔ አው ዳዒያ ናሼቻ ዲራው፣ ማሰቃሊያ ቦላ ሚሲማሪያን ዲሼቲዳ ሃይቃናዋ ጌንጪዳ፣ ያሳ ካዉቴላ ኦይዲያፔ ኡሼቻ ባጋና ኡቴዳ።

3 ሂንቱንቱ ሂንቱንቱ ዋዛና ባዩዚዳ ዳቡሬና ማላ፣ ናጋራንቻቱ ባሬና ዳሮ ኢዲናካ ጌንጩዳ ዩሱሳ ቆፔቴ። 4 ናጋራና ሂንቱንቱ ባፀቲዳ፣ ሱላ ጉሳና ጋካናው ቢሮ ኦሎቲ ዲጊቤይኪታ። 5 ያሳይ ባሬ ናናዳን፣ ሂንቱንታ ዘሪያዋ ዶጌዲቴ? ያሳይ ሂንቱንታ፣ «ታ ናዓው፣ ያሳይ ኔና ሙሪያ ዋዳ፣ ላፋባዳን ቆፖፓ።

ኢ ኔና ሴሪያ ዋዳካ ያዮፓ።

6 አዩሲ ጎፔ፣ ኢ ባሬ ሲቂያ ኡራ ሙሬ፤ ቃሲ ባሬ ናዓዳን ኣኪያ ኡባካ ሊሱዋን ሾጩ» ያጌዳ። 7 ያሳይ ሂንቱንታ ሙሪያ ዋዳ ጌንጪቲ። አዩሲ ጎፔ፣ ኢ ሂንቱንታ ናናዳን አሌ። አዉ ሴሬና ናዓይ ዳዒ? 8 ናና

11:34 ዳን 3:1-30 11:35 1ካት 17:17-24፤ 2ካት 4:25-37 11:36 1ካት 22:26-27፤ 2ኦድ 18:25-26፤ ኤርም 20:2፤ 37:15፤ 38:6 11:37 2ኦድ 24:21 12:5 ዮብ 5:17፤ ለም 3:11-12

ኡባ ሴሪያዎዳን፣ ሂንቲንታ ሙሪናን አጎፔ፣ ካሬን ዩሌቲዳዎንታ ገዲታፔ አቲን፣ ቱሙ ናና ገዲኪታ። 9 ሄዋ ቦላን ቃሲ፣ ኑና ዩሌዳ ኑ አዎቱ ኑና ሙሪዳ ዎዴ፣ ኑኒ ኡንቱንታ ቦንቼዴ። ያቲና፣ ኑኒ ዋኒዴ አያና አቦ ሎይሊ ዳሪሲ ሞዴቲዴ ዴዎኮ? 10 አዩሲ ጎፔ፣ ኑና ዩሌዳ ኑ አዎቱ ባሬንታ ሎዎዎዳን፣ አማራዳ ዎዲያ ኑና ሙሪዲና፤ ሺን ያሳይ ኑኒ አ ጌሻቴላ አካና ማላ፣ ኑና ማዳናው ሙሪ። 11 ኑኒ ሙሪቲያ ዎዴ፣ ሃዲው ዩሎዬ፤ ናሽቴና። ሺን ሙሪዳዎንቶ ጉዬፔ ሄ ሙራይ ዪሎቴላ ዴዑዋ ሳርቴላ ዎይታ አማና።

ዘሪያኔ ሴሪ

12 ሄዋ ዲራው፣ ሂንቲንቱ አርጋጩዳ ኩሺያኔ ሂንቲንቱ ዳቡሪዳ ጉልባታ ማንሌሊቴ። 13 ዎቢያ ጌዲ ፓፃናፔ አቲን፣ ቡርቄና ማላ፣ ሱሬ ኦጊያን ሃማቲቴ።

14 አሳ ኡባና ሳሮ ዳዳናው ማኒቴ፤ ቃሲ ጌሻ ዴዑዋ ዳዲቴ። አዩሲ ጎፔ፣ ጌሻቴላይ ባይናን ኦኒኔ ጎዳ ቤዳናው ዳንዳዬና። 15 ያሳ አጼ ከካቴላ ኦኒኔ አከናን አቴና ማላ ናጌቲቴ፤ ቃሲ ደላዴ፣ ባሬ ማርዚያን አሳ ዎዩሲያ ጫሞ ማላዳን ሃኒዴ፣ ኦኒኔ ዳሮ አሳ ቱኒሴና ማላ ናጌቲቴ። 16 ዎሹማናው ካጄሊያ አሳይ ኦኒኔ ዴዔና ማላ፣ ዎይ ቃሲ አቲ ጌዴ ማያባው ባሬ ባይራቴላ ዛሊዔዳ፣ አያናባ ካዉሺሲያ ኤሳ ማላ አሳይካ ዴዔና ማላ ናጌቲቴ። 17 ሄዋፔ ጉዩያን፣ ኤሳይ ባሬ አቡ አንጃዎ አካናው ኮዬዳዎ ኤሪታ፤ ሺን አ አቡ አ አንጃናን ኢዳዳ፤ አዩሲ ጎፔ፣ ናጋራፔ ሲሚያ ኦጊያ ኢ ሃራይ አቶ፣ አሮዒ ኮዩዴካ ዳማናው ዳንዳዩቤና።

18 ሂንቲንቱ ቦቻናው ዳንዳዩያ ዴሪያኮኔ ኤዲያ ታማኮ፣ ጳማኮ፣ ሻሪያኮኔ ጎቱዋኮ፣ 19 ቃሲ ማላካታ ዋሱዋኮኔ ቃላ ኮሻኮ ዩቤይኪታ። አሳይ ሄ ኮሻ ሲሴዳ ዎዴ፣ ሃራ ጉጂ ሲሴና ማላ ዎሴዳ። 20 አዩሲ ጎፔ፣ ያሳይ ኡንቱንታ፣ «ሃራይ አቶ፣ ደዳይካ ሄ ዴሪያ ቦቻ፣ ሹቻን ጫዴቲዴ ሃይቆ» ያጌዳ አዛዙዋ ኡንቱንቱ ጌንጫናው ዳንዳዩቤዩኪኖ። 21 አይፊያን ቤቲያዌ ዳሮ ዳጋንሊያዎ ገዲያ ዲራው ሙሴ፣ «ታኒ ያሻን ኮኮራይ» ያጌዳ።

12:12 እሳ 35:3 12:13 ለም 4:26 12:15 ዛር 29:18 12:16 ዶም 25:29-34 12:17 ዶም 27:30-40 12:18 ኬስ 19:16-22፤ 20:18-21፤ ዛር 4:11-12፤ 5:22-27 12:20 ኬስ 19:12-13 12:21 ዛር 9:19

22 ሺን ሂንቴንቱ ዲሶኔ ዳሪያ፡ ዳዖ ያሳይ ዳዲያ ካታማ፡ ኢቲፔ ሸቂዳ ናሹቲያ ዳሮ ሻዓ ኪታንቻቱቀኮ ሳሉቀ ዩሩሳላሜ ዩዲታ።

23 ያሳ ባይራ ናናቱቀኮ፡ ኢቲፔ ሸቂዳቀንቱኮ፡ ኡንቱንቱ ሱንጻይ ሳሉቀን ፃፊቴዳቀንቱኮ ዩዲታ፤ ቃሲ ኣሳ ኡባ ፒርዲያ ያሳኮኔ፡ ባላይ ባይናቀንታ ኦሌዳ ዲሎ ኣሳቱቀ ኣያናቱቀኮ ዩዲታ።

24 ኦራፋ ጫቆ ጋናቲያ ዩሱሳኔ ኣቤላ ሱፋፔ ኣጲያቀ ኦዲያ ጉኬዳ ሱፋኮ ዩዲታ።

25 ሂንቴንቱሲ ኦዲያ ኡራ ዩወቀ ሲሲያቀ ሂንቴንቱ ኢጻና ማላ፡ ሂንቴንታ ናጊቴ። ያሳ ኪታ ሳዓን ባራንቶ ኦዲያዌ ኦዲያቀ ሲሴናን ኢጻዳቀንቱ ኣታና ጳዮፔ፡ ሳሉቀን፡ «ሂንቴና ናጊቴ» ጊያ ያሳፔ ኮኒ ቀኒዳ ኣታኔ? 26 ሄ ዎዳ ኣ ኮሻይ ሳዓ ቃሌዳ፤ ሺን ኢ ሃዒ፡ «ታኒ ሳዓ ፃላላ ጊዳናን፡ ኢቲ ጌዳ ጉጃዳ ሳሉቀካ ቃላና» ያጌዳ። 27 «ኢቲ ጌዳ ጉጃዳ» ጊያ ቃላይ ቃፃናባይ ሚኒዳ ዳዓና ማላ፡ ሜጴቴዳባይ ቃፃናቀኔ ኪቻናቀ ጌሺዳ ቤሴ።

28 ኮኒ ቃፃናው ዳንዳዬና ካወቴላ ኣኪያ ዲራው፡ ኣኔ ያሳ ጋላቶይቴኔ ኣ ናሹቾይቴ፤ ኣው ቤሲያቀዳን ቦንቹቀኒኔ ያሻቴላን ኣው ጎዩናይቴ። 29 ኣዩሲ ጎፔ፡ ኦ ያሳይ ቱሙ ባዩዚያ ታማ።

13

ያሳ ኮኒ ዎቲ ናሹቻናው ቤሲንቶ

1 ሂንቴንቱ ኢሻቱቀ ሰቂያቀ ኣጎፒቴ። 2 ኢማላ ሞኪያቀካ ደጎፒቴ። ኣዩሲ ጎፔ፡ ያቲያቀን ኢቲ ኢቲ ኣሳይ ኤሪናን ኪታንቻቱቀ ሞኬዳ። 3 ቃሾ ጎሌን ዳዲያቀንቱባ ሂንቴንቱካ ኡንቱንቱና ኢቲፔ ቃሾ ጎሌን ዳዲያቀዳን ቆፒቴ፤ ቃሲ ሂንቴንቱ ሂንቴንቱ ሁጹው ዎዩቲያቀዳን፡ ዎዩቲያቀንቱባ ቆፒቴ።

4 ኣኪያቀኔ ጌሊያቀ ኣሳይ ኡባይ ቦንቻናው ቤሴ፤ ቃሲ ኣሲናይኔ ማቻታ ኢቱ ኢቱቀሲ ኣማኔታናው ቤሴ፤ ኣዩሲ ጎፔ፡ ያሳይ ዎሹማናው ካጃሊያቀንታኔ ዎሹሚያቀንታ ፒርዳና።

5 ሚሻ ሰቁቀፔ ሂንቴንታ ናጊቴ፤ ሂንቴንቱሲ ዳዲያቀ ሂንቴንቱሲ ጊዳ። ኣዩሲ ጎፔ፡ ያሳይ ባሬ ሁጹው፡

«ታኒ ኔና ኡባካ ዩጊኬ
ዎይ ኣጊኬ»

ያጌዳ። 6 ሄቀ ዲራው፡ ኮኒ ፃሊዳ፡

12:24 ዶም 4:10 12:25 ኬስ 20:22 12:26 ሃግ 2:6 12:29 ዛር 4:24 13:2 ዶም 18:1-8፤ 19:1-3 13:5 ዛር 31:6፣ 8፤ ኢያ 1:5

«ጎዳይ ታና ማዲያዎ፤
ታኒ ያዩኬ።
እሳይ ታና ኣይ ኦሊ?»
ያጌቶ።

7 ያሳ ቃላ ሂንቴንቴሲ ኦዲዳ ሂንቴንታ ካሌሌዳዎንታ ሃሳዩቴ፤ ኡንቴንቴ ዋኒ ዴዔዲኖንቶኔ ሃሳዩቴ፤ ቃሲ ኡንቴንቴዎዳን ኣማኒቴ።

8 ዩሱሲ ኪሪሰቶሲ ዚኖካ ሃቼካ ማዲናውካ ላማቴና። 9 ዲማ ዲማ ኦራላ ቲሚርቲያን ዎራ ቦፒቴ። ኑ ዎዛናይ ያሳ ኣቶ ከካቴላን ሚኖፕ ሎዎ ጊዲያዎፕ ኣቲን፣ ቁማ ዎጋቶ ኣዛዜቴያዎ ጊዴና፤ ሄዎ ኣዛዜቴዳዎንቴካ ማዴቲቤይኪና።

10 ኑሲ ያርሺያሳይ ዴዔ፤ ዲንካኒያ ጊዶን ኦሊያዎንቴ ሄ ያርሺያሳፕ ማናው ኡንቴንቶ ማታይ ባዎ። 11 ቁሳቱዎ ኡባቱዎ ካፑ ናጋራ ዲራው፣ ማሂያ ሱላ ያርሻናው ኡባፕ ኣቋያ ጌሻ ሳዓ ኣፌ፤ ሺን ሄ ማሂያ ኣሹዎ ቃሲ ዲርሳፕ ካሬና ጉዴ። 12 ሄዎ ዲራው፣ ዩሱሲካ ቃሲ ናጋራፕ ኣሳ ባሬ ሱላን ጌሻናው፣ ካታማ ፔንጊያፕ ካሬና ዎዩቴዳ። 13 ሲሚ ኑኒ ኢ ቦሬቴዳ ቦሬያ ኣኪዴ፣ ዲርሳፕ ካሬ ኣኮ ከሶይቴ። 14 ኣዩሲ ጎፕ፣ ኑሲ ሃዎን ማዲናው ዴዔያ ካታማይ ባዎ፤ ሺን ኑኒ ያና ካታማ ናጌቶ።

15 ሲሚ ያሳው ዩሱሳ ባጋና ኡባ ዎዴ ጋላታ ያርሹዎ ኣዎይቴ፤ ሄዎ ጊያዌ ማቴርሻይ ኣ ሱንጎው ኣሚያ ጋላታ ጊያዎ። 16 ሎዎባ ኦሊያዎኔ ኢቱ ኢቱዎ ማዲያዎ ዶጎፒቴ። ኣዩሲ ጎፕ፣ ያሳ ናሼቺያዌ ሄዎ ማላ ያርሹዎ።

17 ሂንቴና ካሌሊያዎንቶ ኣዛዜቴቴ፤ ቃሲ ኡንቴንቴ ኣዛዚያዎካ ኦሊቴ። ኡንቴንቴ ባሬንቴ ኦሌዳዎ ያሳው ኦዳና ዲራው፣ ሂንቴንቴ ሺምፑዎ ሎይሊ ናጊኖ፤ ሂንቴንቴ ኡንቴንቶ ኣዛዜቶፕ፣ ባሬንቴ ኦሱዎ ናሼቲዴ ኦላና፤ ሄዌ ቆዮፕ፣ ኡንቴንቴ ዩሎቲዴ ኦላና፤ ሄዌ ሂንቴንታ ኣይኔ ማዴና።

18 ኑሲ ያሳ ዎሲቴ። ኑኒ ኡባ ዎዴ ሎዎባ ኦላናው ኮዩያ ዲራው፣ ኑና ዘሪያ ሎዎ ዎዛናይ ኑሲ ዴዔ። 19 ያሳይ ታና ሂንቴንቴኮ ኤሌካ ዛራና ማላ፣ ያሳ ሂንቴንቴ ሎይሊ ዎሳናዳን፣ ታኒ ሂንቴንታ ሎይላ ዎሳይ።

ዎሳ

20 ሳርቴላ ያሳይ፣ ኑ ጎዳ ዩሱሳ፣ ዶርሳቱዎ ሂንጎንቻ ዎልቃማ፣ ማዲና ጫቁዎ ሱላን ሃይቁዎፕ ዴንሌዳ። 21 ያሳይ ዩሱሲ ኪሪሰቶሳ ባጋና ባሬ ሲንጎን ባሬና ናሼቺያዎ ሂንቴንታ ኦሲሲዴ።

ሂንቴንቴካ ኢ ኮዬዳዎ ኦላና ማላ፥ ሎዖ ኦሱዋ ኡባን ሂንቴንታ ኢ ገገሶ፤ ያሳይ ሜጲ ሜጲናው ቦንቼቶ። አሜንዒ።

ቁቴላ ቃላ

22 ታናዳን አማኒያዋንቶ፥ ታኒ ሃ ዳቢዳቢያ ሂንቴንቴሲ ቃንላን ፃፌዳ ዲራው፥ ሂንቴንቴ ሃ ዞሪያ ሳሌቴናን ሲሳና ማላ፥ ታኒ ሂንቴንታ ዋሳይ።

23 ኑ አሻይ፥ ሂዋቶሲ ቃሹዋፔ ቢሌቴዳዋ ኤሪቴ። ኤሌሊ ኢ ሃ ዮፔ፥ ታኒ አናና ባዴ ሂንቴንታ ቤዓና።

24 ሂንቴና ካሌሊያ ኡባቱዋኔ ያሳ አሳቱዋ ኡባ ሳሮ ሳሮ ገቴ። ፃሊያፔ ዬዳ አማኒያዋንቱ ሂንቴንታ ሳሮ ሳሮ ገኖ።

25 አጶ ከካቴላይ ሂንቴናና ኡባና ኢቲፔ ገዶ። አሜንዒ።

Ooratha Caaquwaa
New Testament in Dawro (ET:dwr:Dawro)

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dawro

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source
files dated 29 Jan 2022
585b63ca-b8e6-55c8-bfef-10bdc95ad69c